

ओं नमः परमात्मने, श्री महागणपतये नमः,

श्री गुरुभ्यो नमः

॥ हरिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

प्रथमकाण्डे पञ्चमः प्रश्नः

---

## **Version Notes:**

**This is now the current Version 2.1 dated July 31, 2025.**

1. This replaces the earlier version 2.0 dated June 30, 2024.
2. No errors found in this version.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id [vedavms@gmail.com](mailto:vedavms@gmail.com)

## **Earlier Versions**

1st	Version Number	0.0	dated 31st Mar 2019
2nd	Version Number	0.1	dated 31st Mar 2020
3rd	Version Number	0.2	dated 30th June 2020
4th	Version Number	0.3	dated 31st Aug 2020
5th	Version Number	1.0	dated 30th June 2021
6th	Version Number	1.0	dated 31st Oct 2021
7th	Version Number	1.1	dated 31st Aug 2022
8th	Version Number	1.2	dated 31st Oct 2023
9th	Version Number	2.0	dated 30th June 2024

---

## Table of Contents

### 1 कृष्ण यजुर्वेदीय तैत्तिरीय संहिता पद पाठे

प्रथमंकाण्डं ..... 5

1.5 प्रथमकाण्डेपञ्चमः प्रश्नः – पुनराधानं ..... 5



ओं नमः परमात्मने, श्री महागणपतये नमः,

श्री गुरुभ्यो नमः ॥ हरिः ओं

## 1 कृष्ण यजुर्वेदीय तैत्तिरीय संहिता पद पाठे प्रथमकाण्डं

### 1.5 प्रथमकाण्डेपञ्चमः प्रश्नः – पुनराधानं

#### TS 1.5.1.1

दे॒वा॒सु॒राः सँ॑य॒त्ता आ॒सन् ते दे॒वा वि॒ज॒य॒मु॒प॒य॒न्तो ऽग्नौ॑ वा॒मं वँ॒सु  
सं न्य॑द॒ध॒ते॒द॒मु॒ नो भ॑विष्य॒ति य॒दि नो जे॑ष्यन्तीति॒ तद॒ग्नि॒र्न्य॑का॒म॒य॒त  
तेना॑पा॒क्राम॑त् तद्-दे॒वा वि॒जि॒त्याव॑रु॒रु॒थ्स॒मा॒ना अ॒न्वा॒यन् तद॑स्य  
सह॒साऽऽ \*दि॑त्सन्त॒ सो ऽरो॑दीद्-यद॒रो॑दीत् तद् रु॒द्रस्य॑ रु॒द्रत्वं  
यँ॑दश्च॒व॒शी॒य॒त तद् - [ ] 1

#### TS 1.5.1.1 (Padam)

दे॒वा॒सु॒रा इति॑ दे॒व - अ॒सु॒राः । सँ॑य॒त्ता इति॑ सं - य॒त्ताः । आ॒सन् ।  
ते । दे॒वाः । वि॒ज॒य॒मि॒ति वि॒ - ज॒य॒म् । उ॒प॒य॒न्त इत्यु॑प - य॒न्तः ।  
अ॒ग्नौ । वा॒मम् । वँ॒सु । स॒म् । नी॒ति । अ॒द॒ध॒त । इ॒द॒म् । उ॒ । नः ।

भ॒वि॒ष्य॒ति॒ । य॒दि॒ । नः॒ । जे॒ष्य॒न्ति॒ । इति॒ । तत् । अ॒ग्निः॒ । नी॒ति॒ ।  
अ॒क्राम॒य॒त॒ । ते॒न॒ । अ॒पे॒ति॒ । अ॒क्राम॒त् । तत् । दे॒वाः ।  
वि॒जि॒त्ये॒ति॒ वि – जि॒त्य॒ । अ॒वरु॒रु॒थ्स॒मा॒ना॒ इत्य॒व – रु॒रु॒थ्स॒मा॒नाः॒ ।  
अ॒न्वि॒ति॒ । आ॒य॒न् । तत् । अ॒स्य॒ । स॒ह॒सा॒ । ए॒ति॒ । अ॒दि॒थ्स॒न्त॒ ।  
सः । अ॒रो॒दी॒त् । यत् । अ॒रो॒दी॒त् । तत् । रु॒द्रस्य॑ । रु॒द्र॒त्व॒मि॒ति॒  
रु॒द्र – त्व॒म् । यत् । अ॒श्रु॒ । अ॒शी॒य॒त॒ । तत् । 1 (50)

**TS 1.5.1.2**

र॒ज॒त॒म्॑ हिर॒ण्य॒म॒भ॒व॒त् तस्मा॑द् र॒ज॒त॒म्॑ हिर॒ण्य॒-म॒दक्षि॒ण्य॒-म॒श्रु॒ज॒म्॑  
हि॒ यो ब॒र्हि॒षि॒ द॒दा॒ति॒ पु॒रा ऽस्य॑ सँव॒थ्स॒रा॒द् गृ॒हे रु॒द॒न्ति॒ तस्मा॑द्-  
ब॒र्हि॒षि॒ न दे॒य॒म् सो॒ ऽग्नि॑रब्रवीद् भा॒ग्य॒सा॒न्य॒थ॒ व इ॒द॒मि॒ति॒  
पुन॑रा॒धे॒यं ते॒ के॒वल॒मि॒त्य॒ब्रु॒वन्-नृ॒ध्न॒व॒त् ख॒लु स इत्य॑ब्रवीद्-यो  
म॒द्दे॒व॒त्य॒-म॒ग्नि॒-मा॒द॒धा॒ता॒ इति॒ तं पू॒षा ऽऽ \*ध॒त्त॒ ते॒न॒ – [ ] 2

**TS 1.5.1.2 (Padam)**

र॒ज॒त॒म् । हि॒र॒ण्य॒म् । अ॒भ॒व॒त् । तस्मा॑त् । र॒ज॒त॒म् । हि॒र॒ण्य॒म् ।  
अ॒दक्षि॒ण्य॒म् । अ॒श्रु॒ज॒मि॒त्य॒श्रु – ज॒म् । हि॒ । यः । ब॒र्हि॒षि॒ ।  
द॒दा॒ति॒ । पु॒रा । अ॒स्य॒ । सँव॒थ्स॒रा॒दि॒ति॒ सं – व॒थ्स॒रा॒त् ।

गृ॒हे । रु॒दन्ति॑ । तस्मा॑त् । ब॒र्हिषि॑ । न । दे॒यम् । सः । अ॒ग्निः ।  
 अ॒ब्रवी॑त् । भा॒गी । अ॒सानि॑ । अथ॑ । वः । इ॒दम् । इति॑ ।  
 पु॒नरा॑धेयमिति पुनः – आ॒धेयम् । ते । के॒वलम् । इति॑ । अ॒ब्रुव॑न् ।  
 ऋ॒द्ध्नव॑त् । ख॒लु । सः । इति॑ । अ॒ब्रवी॑त् । यः । म॒दे॒वत्य॑मिति  
 मत् – दे॒वत्य॑म् । अ॒ग्निम् । आ॒दधा॑ता इत्या – दधा॑तै । इति॑ । तम् ।  
 पू॒षा । एति॑ । अ॒धत्त॑ । तेन॑ । 2 (50)

**TS 1.5.1.3**

पू॒षा ऽऽर्द्ध॑नोत् तस्मा॑त् पौ॒ष्णाः प॒शव॑ उच्यन्ते तं त्वष्टा॑ ऽऽ \*धत्त॑ तेन॑  
 त्वष्टा॑ ऽऽर्द्ध॑नोत् तस्मा॑त् त्वाष्ट्राः प॒शव॑ उच्यन्ते तं म॒नुरा॑ ऽधत्त॑ तेन॑  
 म॒नुरार्द्ध॑नोत् तस्मान्मा॒नव्यः प्र॒जा उच्यन्ते॑ तं धा॒ताऽऽ \*धत्त॑ तेन॑  
 धा॒ता ऽऽर्द्ध॑नोत् सँव॑त्सरो वै धा॒ता तस्मा॑त् सँव॑त्सरं प्र॒जाः  
 प॒शवो॑ ऽनु प्र जा॑यन्ते य एवं पु॒नरा॑धेयस्यर्द्धिँ वे॒द – [ ] 3

**TS 1.5.1.3 (Padam)**

पू॒षा । आ॒र्द्ध॑नोत् । तस्मा॑त् । पौ॒ष्णाः । प॒शवः॑ । उच्य॑न्ते । तम् ।  
 त्वष्टा॑ । एति॑ । अ॒धत्त॑ । तेन॑ । त्वष्टा॑ । आ॒र्द्ध॑नोत् । तस्मा॑त् । त्वाष्ट्राः ।  
 प॒शवः॑ । उच्य॑न्ते । तम् । म॒नुः । एति॑ । अ॒धत्त॑ । तेन॑ । म॒नुः ।

आ॒र्द्ध॒नो॒त् । तस्मा॑त् । मा॒न॒व्यः । प्र॒जा इति॑ प्र – जाः । उ॒च्य॒न्ते ।  
तम् । धा॒ता । ए॒ति । अ॒ध॒त्त । ते॒न । धा॒ता । आ॒र्द्ध॒नो॒त् । सँ॒व॒थ्स॒र इति॑  
सं – व॒थ्स॒रः । वै । धा॒ता । तस्मा॑त् । सँ॒व॒थ्स॒रमि॒ति सं॒-व॒थ्स॒रम् ।  
प्र॒जा इति॑ प्र॒-जाः । प॒श॒वः । अ॒नु । प्रे॒ति । जा॒य॒न्ते । यः । ए॒वम् ।  
पु॒न॒रा॒धे॒य॒स्येति॑ पु॒नः – आ॒धे॒य॒स्य । ऋ॒द्धि॒म् । वे॒द । 3 (50)

**TS 1.5.1.4**

र॒ध्नो॒त्ये॒व यो॑ ऽस्यै॒वं ब॒न्धु॒तां वे॒द ब॒न्धु॒मान् भ॒वति॑ भा॒ग॒धे॒यं वा  
अ॒ग्निरा॒हित इ॒च्छ॒मानः॑ प्र॒जां प॒शून् यज॑मान॒स्योप॑ दो॒द्रावो॒द्वा॒स्य पु॒न॒रा  
द॒धी॒त भा॒ग॒धे॒ये॒नै॒वैन॑ सम॒र्द्ध॒य॒त्यथो॑ शा॒न्ति॒रे॒वा॒स्यै॒षा  
पु॒न॒र्व॒स्वो॒रा॒द॒धी॒तै॒तद्-वै पु॒न॒रा॒धे॒य॒स्य नक्ष॑त्रं य॒त् पु॒न॒र्व॒सू स्वा॒या॒मे॒वैनं॑  
दे॒व॒ता॒या॒मा॒धाय॑ ब्र॒ह्म॒व॒र्च॒सी भ॒वति॑ द॒र्भै॒- ( )-रा द॒धा॒त्य॒या॒त॒या॒म॒त्वा॒य  
द॒र्भै॒रा द॒धा॒त्य॒द्भ्य ए॒वैन॑मोष॒धी॒भ्यो ऽव॒रु॒द्ध्य॒ाऽऽ ध॒त्ते प॒ञ्च॒क॒पा॒लः  
पु॒रो॒डा॒शो भ॒वति॑ प॒ञ्च॒ वा ऋ॒त॒व ऋ॒तु॒भ्य ए॒वैन॑मव॒रु॒द्ध्य॒ाऽऽ ध॒त्ते ॥ 4

**TS 1.5.1.4 (Padam)**

ऋ॒द्ध॒नो॒ति । ए॒व । यः । अ॒स्य॒ । ए॒वम् । ब॒न्धु॒ताम् । वे॒द । ब॒न्धु॒मा॒निति॑  
ब॒न्धु – मा॒न् । भ॒वति॑ । भा॒ग॒धे॒य॒मि॒ति भा॒ग – धे॒यम् । वै । अ॒ग्निः ।



आ॒हि॒त॒ इ॒त्या – हि॒तः॑ । इ॒च्छ॒मा॒नः॑ । प्र॒जा॒मि॒ति॑ प्र-जा॒म् । प॒शून् ।  
यज॑मा॒नस्य॑ । उ॒पे॒ति॑ । दो॒द्रा॒व । उ॒द्वा॒स्ये॒त्यु॒त् – वा॒स्य॑ । पु॒नः॑ । ए॒ति॑ ।  
द॒धी॒त॒ । भा॒ग॒धे॒ये॒ने॒ति॑ भा॒ग – धे॒ये॒न॑ । ए॒व । ए॒न॒म् । स॒मि॒ति॑ ।  
अ॒र्ध॒य॒ति॑ । अ॒थो इ॒ति॑ । शा॒न्तिः॑ । ए॒व । अ॒स्य॑ । ए॒षा । पु॒नर्व॑स्वो॒रि॒ति॑  
पु॒नः॑ – व॒स्वोः॑ । ए॒ति॑ । द॒धी॒त॒ । ए॒तत् । वै । पु॒नरा॑धे॒यस्ये॒ति॑  
पु॒नः॑ – आ॒धे॒यस्य॑ । नक्ष॑त्रम् । यत् । पु॒नर्व॑सू इ॒ति पु॒नः॑ – व॒सू ।  
स्वा॒या॒म् । ए॒व । ए॒न॒म् । दे॒वता॑या॒म् । आ॒धा॒ये॒त्या – धा॒य॑ ।  
ब्र॒ह्म॒व॒र्च॒सी॒ति॑ ब्र॒ह्म – व॒र्च॒सी॑ । भ॒व॒ति॑ । द॒र्भेः॑ ( ) । ए॒ति॑ । द॒धा॒ति॑ ।  
अ॒या॒त॒या॒म॒त्वा॒ये॒त्य॒या॒त॒या॒म – त्वा॒य॑ । द॒र्भेः॑ । ए॒ति॑ । द॒धा॒ति॑ ।  
अ॒द्भ्य॑ इ॒त्य॒त् – भ्यः॑ । ए॒व । ए॒न॒म् । ओ॒ष॒धी॒भ्य॑ इ॒त्यो॒ष॒धि-भ्यः॑ ।  
अ॒व॒रु॒द्ध्ये॒त्य॒व – रु॒द्ध्य॑ । ए॒ति॑ । ध॒त्ते॑ । प॒ञ्च॒क॒पा॒ल इ॒ति॑  
प॒ञ्च – क॒पा॒लः॑ । पु॒रो॒डा॒शः॑ । भ॒व॒ति॑ । प॒ञ्च॑ । वै । ऋ॒त॒वः॑ ।  
ऋ॒तु॒भ्य॑ इ॒त्यृ॒तु – भ्यः॑ । ए॒व । ए॒न॒म् । अ॒व॒रु॒द्ध्ये॒त्य॒व – रु॒द्ध्य॑ ।  
ए॒ति॑ । ध॒त्ते॑ ॥ 4 (75)

(अ॒शी॒य॒त॒ तत्- ते॒न-वे॒द- द॒र्भेः॑ प॒ञ्च॒विं॒श॒ति॒श्च॑) (A1)

**TS 1.5.2.1**

परा वा एष यज्ञं पशून् वपति यो ऽग्निमुद्वासयते पञ्चकपालः  
पुरोडाशो भवति पाङ्क्तो यज्ञः पाङ्क्ताः पशवो यज्ञमेव पशून्व  
रुन्धे वीरहा वा एष देवानां यो ऽग्निमुद्वासयते न वा एतस्य ब्राह्मणा  
ऋतायवः पुरा ऽन्नमक्षन् पङ्क्त्यो याज्यानुवाक्या भवन्ति पाङ्क्तो  
यज्ञः पाङ्क्तः पुरुषो देवानेव वीरं निरवदायाग्निं पुनरा – [ ] 5

**TS 1.5.2.1 (Padam)**

परेति । वै । एषः । यज्ञम् । पशून् । वपति । यः । अग्निम् ।  
उद्वासयत इत्युत् – वासयते । पञ्चकपाल इति पञ्च – कपालः ।  
पुरोडाशः । भवति । पाङ्क्तः । यज्ञः । पाङ्क्ताः । पशवः । यज्ञम् ।  
एव । पशून् । अवेति । रुन्धे । वीरहेति वीर – हा । वै । एषः ।  
देवानाम् । यः । अग्निम् । उद्वासयत इत्युत् – वासयते । न । वै ।  
एतस्य । ब्राह्मणाः । ऋतायव इत्यृत-यवः । पुरा । अन्नम् । अक्षन् ।  
पङ्क्त्यः । याज्यानुवाक्या इति याज्या – अनुवाक्याः । भवन्ति ।  
पाङ्क्तः । यज्ञः । पाङ्क्तः । पुरुषः । देवान् । एव । वीरम् ।  
निरवदायेति निः – अवदाय । अग्निम् । पुनः । एति । 5 (50)

**TS 1.5.2.2**

धत्ते॑ श॒ताक्ष॑रा भवन्ति॑ श॒तायुः॑ पु॒रुषः॑ श॒तेन्द्रि॑य आयु॑ष्येवेन्द्रि॒ये  
प्रति॑ तिष्ठति॒ यद्-वा॑ अ॒ग्निरा॑हि॒तो न॑र्द्ध्यते॒ ज्यायो॑ भा॒गधे॑यं  
नि॒का॒मय॑मानो॒ यदा॑ग्ने॒यꣳ स॒र्वं भ॑वति॒ सैवा॑स्य॒र्द्धिः सं वा॑ ए॒तस्य॑  
गृ॒हे वाक्॑सृ॒ज्यते॒ यो ऽग्नि॑मु॒द्वास॑यते॒ स वाच॑ꣳ सꣳसृ॒ष्टां य॑ज॒मान॑  
ई॒श्वरो॑ ऽनु॒ परा॑भवितो॒ वि॒भक्त॑यो भवन्ति॑ वा॒चो वि॑धृत्यै  
यज॑मान॒स्या-प॑राभावाय – [ ] 6

**TS 1.5.2.2 (Padam)**

ध॒त्ते । श॒ताक्ष॑रा इति॑ श॒त – अ॒क्षराः॑ । भ॒वन्ति॑ । श॒तायु॑रिति॑  
श॒त – आ॒युः । पु॒रुषः॑ । श॒तेन्द्रि॑य इति॑ श॒त – इन्द्रि॑यः । आ॒युषि॑ ।  
ए॒व । इन्द्रि॑ये । प्र॒तीति॑ । तिष्ठ॑ति । यत् । वै । अ॒ग्निः ।  
आ॒हि॒त इ॒त्या – हि॒तः । न । ऋ॒द्ध्यते॑ । ज्या॑यः । भा॒गधे॑यमिति॑  
भा॒ग – धे॑यम् । नि॒का॒मय॑मान इति॑ नि – का॒मय॑मानः । यत् ।  
आ॒ग्ने॒यम् । स॒र्वम् । भ॑वति । सा । ए॒व । अ॒स्य । ऋ॒द्धिः । स॒मिति॑ ।  
वै । ए॒तस्य॑ । गृ॒हे । वाक् । सृ॒ज्यते॑ । यः । अ॒ग्निम् । उ॒द्वास॑यते॒  
इत्यु॑त् – वा॒सय॑ते । सः । वाच॑म् । सꣳसृ॒ष्टामि॑ति॒ सं – सृ॒ष्टाम् ।

यज॑मानः । ई॒श्वरः॑ । अ॒न्वि॒ति । प॒रा॒भ॒वि॒तो॒रि॒ति॑ प॒रा – भ॒वि॒तोः॑ ।  
 वि॒भ॒क्त॒य इति॑ वि – भ॒क्त॒यः । भ॒व॒न्ति॑ । वा॒चः । वि॒धृ॒त्या इति॑  
 वि – धृ॒त्यै । यज॑मानस्य । अ॒प॒रा॒भा॒वा॒ये॒त्य॒प॒रा – भा॒वा॒य । 6 (50)

**TS 1.5.2.3**

वि॒भ॒क्तिं॑ क॒रो॒ति॒ ब्र॒ह्मै॒व तद॑क॒रु॒पां॒शु यज॑ति यथा॑ वा॒मं व॑सु  
 वि॒वि॒दा॒नो गू॑हति ता॒दृ॒गे॒व तद॑ग्निं प्र॒ति स्वि॑ष्ट॒कृतं॑ नि॒रा॒ह यथा॑ वा॒मं  
 व॑सु वि॒वि॒दा॒नः प्र॒का॒शं जि॑गमिषति ता॒दृ॒गे॒व तद्-वि॑भ॒क्तिमु॑क्त्वा  
 प्र॒या॒जे॒न व॑षट्करोत्याय॒तना॑दे॒व नैति॑ यज॑मानो वै पु॒रो॒डा॒शः प॒श॒व  
 ए॒ते आ॑हु॒ती यद॑भि॒तः पु॒रो॒डा॒शमे॒ते आ॑हु॒ती – [ ] 7

**TS 1.5.2.3 (Padam)**

वि॒भ॒क्ति॒मि॒ति॒ वि – भ॒क्ति॒म् । क॒रो॒ति॒ । ब्र॒ह्म । ए॒व । तत् । अ॒कः ।  
 उ॒पा॒श्रि॒त्यु॒प-अं॑शु । यज॑ति । यथा॑ । वा॒मम् । व॑सु । वि॒वि॒दा॒नः ।  
 गू॑हति । ता॒दृ॒क् । ए॒व । तत् । अ॒ग्नि॒म् । प्र॒ती॒ति॒ । स्वि॑ष्ट॒कृत॒मि॒ति॒  
 स्वि॑ष्ट- कृत॒म् । नि॒रि॒ति॒ । आ॒ह । यथा॑ । वा॒मम् । व॑सु । वि॒वि॒दा॒नः ।  
 प्र॒का॒श॒मि॒ति॒ प्र – का॒श॒म् । जि॑गमिषति । ता॒दृ॒क् । ए॒व । तत् ।  
 वि॒भ॒क्ति॒मि॒ति॒ वि – भ॒क्ति॒म् । उ॒क्त्वा । प्र॒या॒जे॒ने॒ति॒ प्र – या॒जे॒न ।

व॒षट् । क॒रोति॑ । आ॒यत॑ना॒दित्या॑ – यत॑नात् । ए॒व । न । ए॒ति ।

यज॑मानः । वै । पु॒रोडा॑शः । प॒शवः॑ । ए॒ते इति॑ ।

आहु॑ती इत्या – हु॒ती । यत् । अ॒भितः॑ । पु॒रोडा॑शम् । ए॒ते इति॑ ।

आहु॑ती इत्या – हु॒ती । 7 (50)

#### **TS 1.5.2.4**

जुहो॑ति यज॑मानमे॒वोभ॑यतः प॒शुभिः॑ परि गृ॒ह्णाति॑ कृ॒तय॑जुः  
संभृ॑तसंभार इत्याहु॒र्न संभृ॑त्याः संभारा॑ न यजुः कर्त॑व्यमित्यथो खलु॑  
संभृ॑त्या ए॒व संभाराः॑ कर्त॑व्यं यँजु॑र् यज्ञ॑स्य समृ॑द्ध्यै पुन॑र्निष्कृ॒तो  
रथो॑ दक्षि॑णा पुन॑रुथ्स्यूतं वा॒सः पुन॑रुथ्सृष्टो ऽन॒ड्वान् पुन॑राधेय॑स्य  
समृ॑द्ध्यै स॒प्त ते अ॒ग्ने स॒मिधः॑ स॒प्त जि॒ह्वा इत्य॑ग्निहो॒त्रं  
जुहो॑ति यत्र॑यत्रै॒वास्य॑ न्य॒क्तं तत॑ – [ ] 8

#### **TS 1.5.2.4 (Padam)**

जुहो॑ति । यज॑मानम् । ए॒व । उ॒भय॑तः । प॒शुभि॑रिति प॒शु – भिः॑ ।  
प॒रीति॑ । गृ॒ह्णाति॑ । कृ॒तय॑जुरिति कृ॒त – य॒जुः । संभृ॑तसंभार इति  
संभृ॑त – संभाराः॑ । इति॑ । आहुः॑ । न । संभृ॑त्या इति सं – भृ॒त्याः॑ ।  
संभारा॑ इति सं-भाराः॑ । न । यजुः॑ । कर्त॑व्यम् । इति॑ । अथो॑ इति॑ ।

खलु॑ । सं॒भृ॒त्या इति॑ सं – भृ॒त्याः । ए॒व । सं॒भ्रा॒रा इति॑ सं-भ्रा॒राः ।  
 क॒र्त॒व्यम् । य॒जुः । य॒ज्ञस्य॑ । स॒मृ॒द्ध्य॑ इति॑ सं – ऋ॒द्ध्यै ।  
 पु॒न॒र्निष्कृ॑त इति॑ पु॒नः – नि॒ष्कृ॑तः । रथः॑ । दक्षि॑णा ।  
 पु॒न॒रु॒थ्स्यू॑तमिति॑ पु॒नः – उ॒थ्स्यू॑तम् । वा॒सः । पु॒न॒रु॒थ्सृष्ट॑ इति॑  
 पु॒नः – उ॒थ्सृष्टः॑ । अ॒न॒ड्वान् । पु॒न॒रा॒धेय॑स्येति॑ पु॒नः – आ॒धेय॑स्य ।  
 स॒मृ॒द्ध्य॑ इति॑ सं – ऋ॒द्ध्यै । स॒प्त । ते । अ॒ग्ने । स॒मि॒ध इति॑  
 सं – इ॒धः । स॒प्त । जि॒ह्वाः । इति॑ । अ॒ग्नि॒हो॒त्रमि॒त्यग्नि॑ – हो॒त्रम् ।  
 जु॒होति॑ । य॒त्रय॑त्रेति॑ य॒त्र-य॑त्र । ए॒व । अ॒स्य ।  
 न्य॒क्तमि॒ति नि – अ॒क्तम् । ततः॑ । 8 (50)

#### **TS 1.5.2.5**

ए॒वैन॑म॒व रु॒न्धे वी॒र॒हा वा ए॒ष दे॒वानां॑ ँ॒यो ऽग्नि॑मु॒द्वास॑यते॒ तस्य॑ व॒रुण॑  
 ए॒वर्ण॑यादा॒ग्निवा॒रुण-मे॒काद॑शक॒पाल॒मनु॑ निर्व॒पेद्-यं चै॒व ह॑न्ति  
 यश्चा॒स्यर्ण॑यात् तौ भा॒गधे॑येन प्रीणाति॒ नाऽऽर्ति॑मा॒च्छति॑ यज॑मानः ॥ 9

#### **TS 1.5.2.5 (Padam)**

ए॒व । ए॒नम् । अ॒वेति॑ । रु॒न्धे । वी॒र॒हेति॑ वी॒र – हा । वै । ए॒षः ।  
 दे॒वाना॑म् । यः । अ॒ग्निम् । उ॒द्वास॑यत॒ इत्यु॑त् – वा॒सय॑ते । तस्य॑ ।

वरुणः । ए॒व । ऋ॒ण॒या॒दि॒त्यृ॒ण – या॒त् ।

आ॒ग्नि॒वा॒रु॒ण॒मि॒त्या॒ग्नि – वा॒रु॒णम् ।

एका॒द॒श॒क॒पा॒ल॒मि॒त्ये॒का॒द॒श – क॒पा॒लम् । अ॒नु । नि॒रि॒ति । व॒पे॒त् ।

यम् । च । ए॒व । ह॒न्ति । यः । च । अ॒स्य । ऋ॒ण॒या॒दि॒त्यृ॒ण – या॒त् ।

तौ । भा॒ग॒धे॒ये॒ने॒ति भा॒ग – धे॒ये॒न । प्री॒णा॒ति । न । आ॒र्ति॒म् । ए॒ति ।

ऋ॒च्छ॒ति । य॒ज॒मा॒नः ॥ 9 (36)

(आ-ऽप॒रा॒भा॒वा॒य-पु॒रो॒डा॒श॒मे॒ते-आ॒हु॒ती-त॒तः-ष॒ट्त्रि॒ंश॒च्च) (A2)

**TS 1.5.3.1**

भू॒मिर् भू॒म्ना द्यौर् व॒रि॒णा ऽन्त॒रि॒क्षं म॒हि॒त्वा ।

उ॒प॒स्थे ते दे॒व्यदि॒ते ऽग्नि॒म॒न्ना॒द॒म॒न्नाद्या॒याऽऽ द॒धे ॥

आ ऽयं गौः पृ॒श्नि॒र॒क्र॒मी॒द॒स॒नन् मा॒तरं पु॒नः ।

पि॒तरं च प्र॒य॒न्त्सु॒वः ॥

त्रि॒ंश॒द्-धा॒म वि रा॒ज॒ति वाक् प॒त॒ङ्गाय शि॒श्रि॒ये ।

प्र॒त्य॒स्य वह॒ द्यु॒भिः ॥

अ॒स्य प्रा॒णा॒द॒पा॒न॒त्यन्त॒श्च॒रति रो॒च॒ना ।

व्य॒ख्यन्॑ म॒हि॒षः सु॒वः ॥

॥  
यत्त्वा-[ ] 10

**TS 1.5.3.1 (Padam)**

भू॒मिः । भू॒म्ना । द्यौः । व॒रि॒णा । अ॒न्त॒रि॒क्षम् । म॒हि॒त्वे॒ति॑ म॒हि-त्वा ॥

उ॒प॒स्थ इ॒त्यु॒प – स्त्वे । ते । दे॒वि । अ॒दि॒ते । अ॒ग्नि॒म् ।

अ॒न्ना॒द॒मि॒त्य॒न्न – अ॒दम् । अ॒न्ना॒द्या॒ये॒त्य॒न्न – अ॒द्याय॑ । ए॒ति॑ ।

द॒धे ॥ ए॒ति॑ । अ॒यम् । गौः । पृ॒श्निः । अ॒क्र॒मी॒त् । अ॒स॒न॒त् ।

मा॒त॒रम् । पु॒नः ॥ पि॒त॒रम् । च । प्र॒य॒न्नि॒ति॑ प्र – य॒न् । सु॒वः ॥

त्रि॒॒श॒त् । धा॒म । वी॒ति॑ । रा॒ज॒ति॑ । वाक् । प॒त॒ङ्गा॒य । शि॒श्रि॒ये ॥

प्र॒ती॒ति॑ । अ॒स्य॑ । व॒ह । द्यु॒भि॒रि॒ति॑ द्यु – भिः । अ॒स्य॑ ।

प्रा॒णा॒दि॒ति॑ प्र – अ॒ना॒त् । अ॒पा॒न॒ती॒त्य॒प – अ॒न॒ती । अ॒न्तः । च॒र॒ति॑ ।

रो॒च॒ना ॥ वी॒ति॑ । अ॒ख्य॑त् । म॒हि॒षः । सु॒वः ॥ य॒त् । त्वा । 10 (50)

**TS 1.5.3.2**

क्रु॒द्धः प॒रो॒व॒प॑ म॒न्यु॒ना॒ यद॑व॒र्त्या॑ ।

सु॒क॒ल्प॑म॒ग्ने॒ तत्त॒व पु॒न॒स्त्वो॒द्-दी॑प॒याम॑सि ॥

य॒त्ते॑ म॒न्यु॒प॒रो॒प्त॑स्य पृ॒थि॒वी॒म॒नु॑ द॒ध्व॒से॑ ।



आ॒दि॒त्या वि॒श्वे तद्-दे॒वा वस॑वश्च॒ समा॑भरन् ॥

मनो॑ ज्योति॑र् जुषता॒माज्यं॑ वि॒च्छिन्नं॑ य॒ज्ञं समि॑मं दधातु ।

बृह॑स्पतिस्तनुतामिमं नो वि॒श्वे दे॒वा इ॒ह मा॑दयन्तां ॥

सप्त॑ ते अ॒ग्ने स॒मिधः॑ सप्त॒ जिह्वाः॑ सप्त – [ ] 11

**TS 1.5.3.2 (Padam)**

क्रु॒द्धः । प॒रोव॑पेति॒ परा॑ – उ॒वप॑ । म॒न्युना॑ । यत् । अ॒व॒र्त्या ॥

सु॒क॒ल्पमि॑ति॒ सु – क॒ल्पम् । अ॒ग्ने । तत् । तव॑ । पुनः॑ । त्वा ।

उ॒दि॒ति । दी॒प॒या॒म॒सि ॥ यत् । ते । म॒न्युप॑रो॒प्तस्ये॑ति॒ म॒न्यु-प॑रो॒प्तस्य॑ ।

पृ॒थि॒वीम् । अ॒न्वि॒ति । द॒ध्व॒से ॥ आ॒दि॒त्याः । वि॒श्वे ॥ तत् । दे॒वाः ।

वस॑वः । च । स॒मा॒भ॒र॒न्निति॑ सं – आ॒भ॒र॒न् ॥ मनः॑ । ज्योतिः॑ ।

जुष॑ताम् । आ॒ज्यम् । वि॒च्छि॒न्नमि॑ति॒ वि – छि॒न्नम् । य॒ज्ञम् ।

समि॑ति । इ॒मम् । द॒धातु॑ ॥ बृह॑स्पतिः । त॒नुता॑म् । इ॒मम् । नः ।

वि॒श्वे ॥ दे॒वाः । इ॒ह । मा॒द॒य॒न्ताम् ॥ सप्त॑ । ते । अ॒ग्ने ।

स॒मिध॑ इति॒ सं – इ॒धः । सप्त॑ । जिह्वाः॑ । सप्त॑ । 11 (50)

**TS 1.5.3.3**

ऋ॒षयः॑ स॒प्त धाम॑ प्रि॒याणि॑ ।

स॒प्त हो॒त्राः॑ स॒प्त॒धा त्वा॑ यज॒न्ति स॒प्त योनी॑रा **पृ॒णस्वा॑** घृ॒तेन॑ ॥

पुन॑रू॒र्जा नि॑ वर्त॒स्व पुन॑रग्न इ॒षा ऽऽयु॑षा ।

पुन॑र्नः पा॒हि वि॒श्वतः॑ ॥

स॒ह र॒य्या नि॑ वर्त॒स्वाग्ने॑ पि॒न्वस्व॑ धा॒रया॑ ।

वि॒श्व॒फ॒स्नि॒या वि॒श्वत॑स्परि ॥

ले॒कः स॒ले॒कः सु॒ले॒कस्ते॑ न आ॒दि॒त्या आ॒ज्यं जु॒षा॒णा वि॒यन्तु॑ के॒तः

स॒के॒तः सु॒के॒तस्ते॑ न ( ) आ॒दि॒त्या आ॒ज्यं जु॒षा॒णा वि॒यन्तु॑ वि॒वस्वा॑ ॐ

अ॒दि॒तिर् दे॒वजू॒तिस्ते॑ न आ॒दि॒त्या आ॒ज्यं जु॒षा॒णा वि॒यन्तु॑ ॥ 12

**TS 1.5.3.3 (Padam)**

ऋ॒षयः॑ । स॒प्त । धाम॑ । प्रि॒याणि॑ ॥ स॒प्त । हो॒त्राः॑ । स॒प्त॒धेति॑

स॒प्त – धा । त्वा । यज॒न्ति । स॒प्त । योनीः॑ । ए॒ति । पृ॒णस्व॑ ।

घृ॒तेन॑ ॥ पुनः॑ । ऊ॒र्जा । नी॒ति । वर्त॒स्व । पुनः॑ । अ॒ग्ने । इ॒षा ।

आ॒युषा॑ ॥ पुनः॑ । नः॑ । पा॒हि । वि॒श्वतः॑ ॥ स॒ह । र॒य्या । नी॒ति ।

व॒र्तस्व॑ । अ॒ग्ने॑ । पि॒न्वस्व॑ । धा॒रया॑ ॥ वि॒श्व॒फ॒स्नि॒येति॑  
वि॒श्व – फ॒स्नि॒या । वि॒श्वतः॑ । परि॑ ॥ ले॒कः । स॒ले॒क इति॑  
स – ले॒कः । सु॒ले॒क इति॑ सु – ले॒कः । ते । नः । आ॒दि॒त्याः ।  
आ॒ज्यम्॑ । जु॒षा॒णाः । वि॒यन्तु॑ । के॒तः । स॒के॒त इति॑ स – के॒तः ।  
सु॒के॒त इति॑ सु – के॒तः । ते । नः ( ) । आ॒दि॒त्याः । आ॒ज्यम्॑ ।  
जु॒षा॒णाः । वि॒यन्तु॑ । वि॒वस्वा॑न् । अ॒दि॒तिः । दे॒व॒जू॒ति॒रिति॑  
दे॒व – जू॒तिः । ते । नः । आ॒दि॒त्याः । आ॒ज्यम्॑ । जु॒षा॒णाः ।

वि॒यन्तु॑ ॥ 12 (63)

(त्वा-जिह्वाः सप्त-सुकेतस्ते न-स्त्रयोदश च ) (A3)

#### TS 1.5.4.1

भू॒मिर् भू॒म्ना द्यौर् व॒रि॒णे॒त्याहा॑ ऽऽशि॒षै॒वैन॒मा ध॑त्ते॒सर्पा॑ वै जी॒र्य॑न्तो  
ऽम॒न्यन्त॑ स ए॒तं क॑स॒र्णी॒रः का॒द्र॒वे॒यो म॒न्त्र॑मप॒श्यत् ततो॑ वै ते  
जी॒र्णा॒स्त॒नूर॑पा॒घ्नत॑ सर्प॒रा॒ज्ञिया॑ ऋ॒ग्भिर् गा॒र्ह॑प॒त्यमा॑ द॒धाति॑  
पुन॑र्न॒वमे॒वैन॑म॒जरं॑ कृ॒त्वा ऽऽ ध॑त्ते ऽथो॑ पू॒तमे॒व पृ॑थि॒वीम॒न्नाद्यं॑  
नो॒पा॒नम॑थ्सै॒तं – [ ] 13

**TS 1.5.4.1 (Padam)**

भूमिः । भूम्ना । द्यौः । वरिणा । इति । आह । आशिषेत्या – शिषा ।  
एव । एनम् । एति । धत्ते । सर्पाः । वै । जीर्यन्तः । अमन्यन्त ।  
सः । एतम् । कसर्णीरः । काद्रवेयः । मन्त्रम् । अपश्यत् । ततः ।  
वै । ते । जीर्णाः । तनूः । अपेति । अघ्नत । सर्पराज्ञिया इति  
सर्प – राज्ञियाः । ऋग्भिरित्यृक् – भिः । गार्हपत्यमिति  
गार्ह – पत्यम् । एति । दधाति । पुनर्नवमिति पुनः – नवम् । एव ।  
एनम् । अजरम् । कृत्वा । एति । धत्ते । अथो इति । पूतम् ।  
एव । पृथिवीम् । अन्नाद्यमित्यन्न – अद्यम् । न । उपेति । अनमत् ।  
सा । एतम् । 13 (50)

**TS 1.5.4.2**

मन्त्रमपश्यत् ततो वै तामन्नाद्य-मुपानमद्-यथ् सर्पराज्ञिया ऋग्भिर्  
गार्हपत्य-मादधात्यन्नाद्यस्या वरुद्ध्या अथो अस्यामेवैनं प्रतिष्ठितमा  
धत्ते यत्त्वा क्रुद्धः परोवपेत्याहाप हुत एवास्मै तत्  
पुनस्त्वोद्दीपयामसीत्याह समिन्ध एवैनं यत्ते मन्युपरोप्तस्येत्याह  
देवताभिरेवै – [ ] 14

**TS 1.5.4.2 (Padam)**

मन्त्रम् । अपश्यत् । ततः । वै । ताम् । अन्नाद्यमित्यन्न – अद्यम् ।  
उपेति । अनमत् । यत् । सर्पराज्ञिया इति सर्प – राज्ञियाः ।  
ऋग्भिरित्यृक् – भिः । गार्हपत्यमिति गार्ह – पत्यम् ।  
आदधातीत्या – दधाति । अन्नाद्यस्येत्यन्न – अद्यस्य ।  
अवरुद्ध्या इत्यव – रुद्ध्यै । अथो इति । अस्याम् । एव । एनम् ।  
प्रतिष्ठितमिति प्रति – स्थितम् । एति । धत्ते । यत् । त्वा । क्रुद्धः ।  
परोवपेति परा – उवप । इति । आह । अपेति । हुते । एव ।  
अस्मै । तत् । पुनः । त्वा । उदिति । दीपयामसि । इति । आह ।  
समिति । इन्धे । एव । एनम् । यत् । ते । मन्युपरोप्तस्येति  
मन्यु – परोप्तस्य । इति । आह । देवताभिः । एव । 14 (50)

**TS 1.5.4.3**

–नꣳ सं भरति वि वा एतस्य यज्ञश्छिद्यते यो ऽग्निमुद्वासयते  
बृहस्पतिवत्यर्चोप तिष्ठते ब्रह्म वै देवानां बृहस्पतिर् ब्रह्मणैव  
यज्ञꣳ सं दधाति विच्छिन्नं यज्ञꣳ समिमं दधात्वित्याह सन्तत्यै

वि॒श्वे दे॒वा इ॒ह मा॒दय॒न्ता॒मित्या॒ह स॒न्तत्यै॒व य॒ज्ञं दे॒वेभ्यो॑ ऽनु दि॒शति॑  
स॒प्त ते अ॒ग्ने स॒मिधः॑ स॒प्त जि॒ह्वा – [ ] 15

**TS 1.5.4.3 (Padam)**

ए॒नम् । स॒मिति॑ । भ॒रति॑ । वी॒ति । वै । ए॒तस्य॑ । य॒ज्ञः । छि॒द्यते॑ ।  
यः । अ॒ग्निम् । उ॒द्वा॒सय॑त इत्यु॒त् – वा॒सय॑ते । बृ॒हस्प॑ति॒वत्ये॑ति  
बृ॒हस्प॑ति – व॒त्या । ऋ॒चा । उ॒पेति॑ । ति॒ष्ठते॑ । ब्र॒ह्म । वै । दे॒वाना॑म् ।  
बृ॒हस्प॑तिः । ब्र॒ह्मणा॑ । ए॒व । य॒ज्ञम् । स॒मिति॑ । द॒धाति॑ ।  
वच्छि॑न्नमि॒ति वि॒च्छिन्न॑म् । य॒ज्ञम् । स॒मिति॑ । इ॒मम् । द॒धातु॑ । इति॑ ।  
आ॒ह । स॒न्तत्या॑ इति॒ सं – त॒त्यै । वि॒श्वे॑ । दे॒वाः । इ॒ह । मा॒दय॒न्ता॒म् ।  
इति॑ । आ॒ह । स॒न्तत्ये॑ति॒ सं – त॒त्यै । ए॒व । य॒ज्ञम् । दे॒वेभ्यः॑ ।  
अ॒न्विति॑ । दि॒शति॑ । स॒प्त । ते । अ॒ग्ने । स॒मिध॑ इति॒ सं – इ॒धः ।

स॒प्त । जि॒ह्वाः । 15 (50)

**TS 1.5.4.4**

इत्या॑ह स॒प्तस॒प्त वै स॒प्तधा॑ ऽग्नेः प्रि॒यास्त॒नुव॒स्ता ए॒वाव॑ रु॒न्धे  
पुन॑रू॒र्जा स॒ह र॒य्येत्य॑भि॒तः पु॒रोडा॑श॒माहु॑ती जु॒होति॑ य॒जमा॑नमे॒वोर्जा  
च र॒य्या चो॑भ॒यतः॑ परि॑ गृ॒ह्णात्या॑दि॒त्या वा अ॒स्माल्लो॒काद॒मुं

लोकमायन्ते ऽमुष्मिन् लोके व्यतृष्यन्त इमं लोकं  
 पुनरभ्यवेत्याग्निमाधायैतान्. ( ) होमानजुहवुस्त आर्द्धधनुवन्ते सुवर्गं  
 लोकमायन्. यः पराचीनं पुनराधेयादग्निमादधीत स एतान्. होमान्  
 जुहुयाद् यामेवाऽऽदित्या ऋद्धिमार्द्धधनुवन् तामेवर्द्धनोति ॥ 16

**TS 1.5.4.4 (Padam)**

इति । आह । सप्तसप्तेति सप्त – सप्त । वै । सप्तधेति  
 सप्त – धा । अग्नेः । प्रियाः । तनुवः । ताः । एव । अवेति । रुन्धे ।  
 पुनः । ऊर्जा । सह । रय्या । इति । अभितः । पुरोडाशम् ।  
 आहुती इत्या – हुती । जुहोति । यजमानम् । एव । ऊर्जा । च ।  
 रय्या । च । उभयतः । परीति । गृह्णाति । आदित्याः । वै । अस्मात् ।  
 लोकात् । अमुम् । लोकम् । आयन् । ते । अमुष्मिन् । लोके ।  
 वीति । अतृष्यन् । ते । इमम् । लोकम् । पुनः ।  
 अभ्यवेत्येत्यभि – अवेत्य । अग्निम् । आधायेत्या – धाय ।  
 एतान् ( ) । होमान् । अजुहवुः । ते । आर्द्धधनुवन् । ते ।  
 सुवर्गमिति सुवः – गम् । लोकम् । आयन् । यः । पराचीनम् ।

पुन॒रा॒धे॒या॒दि॒ति पुनः॑ – आ॒धे॒यात् । अ॒ग्नि॒म् । आ॒द॒धी॒ते॒त्या॑ – द॒धी॒त ।

सः । ए॒तान् । हो॒मान् । जु॒हु॒यात् । या॒म् । ए॒व । आ॒दि॒त्याः ।

ऋ॒द्धि॒म् । आ॒र्द्ध॒न्नु॒वन् । ता॒म् । ए॒व । ऋ॒द्ध॒नो॒ति ॥ 16 (75)

(सै॒तं-दे॒वता॑भि॒रे॒व-जि॒ह्वा-ए॒तान्-पञ्च॑विं॒शति॑श्च ) (A4)

**TS 1.5.5.1**

उ॒प॒प्र॒यन्तो॑ अ॒ध्व॒रं मन्त्रं॑ वो॒चे॒मा॒ग्नये॑ ।

आ॒रे अ॒स्मे च॑ शृ॒ण्व॒ते ॥

अ॒स्य प्र॒त्ना॒मनु॑ द्यु॒तं शु॒क्रं दु॒दुहे॑ अ॒हयः॑ ।

प॒यः स॒हस्र॑सा॒मृषिं॑ ॥

अ॒ग्नि॒र्मूर्द्धा॑ दि॒वः क॒कु॒त्प॒तिः पृ॒थि॒व्या अ॒यं ।

अ॒पां रे॒तांसि॑ जि॒न्व॒ति ॥

अ॒य॒मि॒ह प्र॒थ॒मो धा॒यि धा॒तृभि॑र्, हो॒ता य॒जि॒ष्ठो अ॒ध्व॒रे॒ष्वीड्यः॑ ।

य॒म॒प्न॒वा॒नो भृ॑ग॒वो वि॒रु॒रुचु॑र्व॒नेषु॑ चि॒त्रं वि॒भु॒वं वि॒शे॒वि॒शे ॥

उ॒भा वा॒मि॒न्द्रा॒ग्नी आ॒हु॒व॒द्ध्य॑ – [ ] 17



**TS 1.5.5.1 (Padam)**

उ॒प॒प्र॒य॒न्त॒ इ॒त्यु॒प॒-प्र॒य॒न्तः॑ । अ॒ध्व॒र॒म् । म॒न्त्र॒म् । वो॒चे॒म॒ । अ॒ग्नये॑ ॥  
आ॒रे । अ॒स्मे इति॑ । च॒ । शृ॒ण्व॒ते ॥ अ॒स्य॑ । प्र॒त्ना॒म् । अ॒न्वि॒ति॑ ।  
द्यु॒त॒म् । शु॒क्र॒म् । दु॒दु॒हे॒ । अ॒ह्यः॑ ॥ प॒यः॑ । स॒ह॒स्र॒सामि॑ति॒  
स॒ह॒स्र॒-सा॒म् । ऋ॒षि॒म् ॥ अ॒ग्निः॑ । मूर्द्॒धा । दि॒वः॑ । क॒कु॒त् । प॒तिः॑ ।  
पृ॒थि॒व्याः॑ । अ॒य॒म् ॥ अ॒पा॒म् । रे॒ता॒सि॑ । जि॒न्व॒ति॑ ॥ अ॒य॒म् । इ॒ह॒ ।  
प्र॒थ॒मः॑ । धा॒यि॑ । धा॒तृ॒भि॒रिति॑ धा॒तृ॒ - भिः॑ । हो॒ता॑ । य॒जि॒ष्ठः॑ ।  
अ॒ध्व॒रेषु॑ । ई॒ड्यः॑ ॥ य॒म् । अ॒प्न॒वा॒नः॑ । भृ॒ग॒वः॑ ।  
वि॒रु॒रु॒चुरि॑ति॒ वि॒ - रु॒रु॒चुः॑ । व॒नेषु॑ । चि॒त्र॒म् । वि॒भु॒वमि॑ति॒  
वि॒ - भु॒व॒म् । वि॒शे॒वि॒श॒ इति॑ वि॒शे॒ - वि॒शे॒ ॥ उ॒भा॑ । वा॒म् ।  
इ॒न्द्रा॒ग्नी॒ इती॑न्द्र - अ॒ग्नी॒ । आ॒हु॒व॒द्ध्यै॑ ॥ 17 (50)

**TS 1.5.5.2**

उ॒भा रा॒ध॒सः॑ स॒ह मा॒द॒य॒द्ध्यै॑ ।  
उ॒भा दा॒ता॒रा॒वि॒षा॒ रयी॑णामु॒भा वा॒ज॒स्य॑ सा॒त॒र्ये॑ हु॒वे वां॑ ॥  
अ॒यं ते॑ यो॒निर्ऋ॒त्वियो॑ यतो॒ जा॒तो अ॒रो॒च॒थाः॑ ।  
तं जा॒न॒न्न॒ग्न॒ आ रो॒हा॒था॑ नो॒ वर्द्ध॑या र॒यिं॑ ॥

अ॒ग्न॒ आ॒यू॒षि॑ प॒वस॒ आ सु॒वोर्ज॑मिषं च नः ।

आ॒रे बा॑धस्व दु॒च्छु॑नां ॥

अ॒ग्ने प॑वस्व स्व॒पा अ॒स्मे वर्चः॑ सु॒वीर्यं॑ ।

द॒धत् पोष॑ र॒यिं – [ ] 18

**TS 1.5.5.2 (Padam)**

उ॒भा । रा॑धसः । स॒ह । मा॒दय॑द्ध्यै ॥ उ॒भा । दा॒तारौ॑ । इ॒षाम् ।

र॒यी॒णाम् । उ॒भा । वा॑जस्य । सा॒तयै॑ । हु॒वे । वा॒म् ॥ अ॒यम् । ते ।

यो॒निः । ऋ॒त्वियः॑ । य॒तः । जा॒तः । अ॒रोच॑थाः ॥ तम् । जा॒नन् ।

अ॒ग्ने । ए॒ति । रो॒ह । अ॒थ । नः॑ । व॒र्द्ध॒य । र॒यिम् ॥ अ॒ग्ने ।

आ॒यू॒षि । प॒व॒से । ए॒ति । सु॒व । ऊ॒र्जम् । इ॒षम् । च । नः॑ ॥ आ॒रे ।

बा॒ध॒स्व । दु॒च्छु॑नाम् ॥ अ॒ग्ने । प॑वस्व । स्व॒पा इति॑ सु – अ॒पाः ।

अ॒स्मे इति॑ । वर्चः॑ । सु॒वीर्य॑मिति सु – वी॒र्यम् ॥ द॒धत् । पोष॑म् ।

र॒यिम् । 18 (50)

**TS 1.5.5.3**

म॒यि ॥

अ॒ग्ने पा॑वक रो॒चिषा॑ म॒न्द्रया॑ दे॒व जि॒ह्वा॑ ।

आ दे॒वान्॑ व॒क्षि॑ य॒क्षि॑ च ॥

स नः॑ पा॒वक॑ दी॒दिवो॑ ऽग्ने॑ दे॒वाँ॑ इ॒हाऽऽ वह॑ ।

उप॑ य॒ज्ञँ॑ ह॒विश्च॑ नः ॥

अ॒ग्निः शुचि॑व्रततमः शुचि॑र्विप्रः शुचिः॑ क॒विः ।

शुची॑ रोचत॑ आहुतः ॥

उद॑ग्ने शुचय॑स्तव शु॒क्रा भ्राज॑न्त ईरते । तव॑ ज्योतीँ॑ष्य॒र्चयः॑ ॥

आ॒युर्दा॑ अ॒ग्ने ऽस्या॑युर्मे – [ ] 19

**TS 1.5.5.3 (Padam)**

मयि॑ ॥ अ॒ग्ने॑ । पा॒वक॑ । रोचि॑षा । म॒न्द्रया॑ । दे॒व । जिह्वा॑ ॥ एति॑ ।

दे॒वान् । व॒क्षि॑ । य॒क्षि॑ । च ॥ सः । नः । पा॒वक॑ । दी॒दिवः॑ । अ॒ग्ने॑ ।

दे॒वान् । इ॒ह । एति॑ । वह॑ ॥ उपेति॑ । य॒ज्ञम् । ह॒विः । च । नः ॥

अ॒ग्निः । शुचि॑व्रततम इति॑ शुचि॑व्रत – तमः॑ । शुचिः॑ । विप्रः॑ ।

शुचिः॑ । क॒विः ॥ शुचिः॑ । रोच॑ते । आहु॑त इत्या – हु॒तः ॥ उदि॑ति ।

अ॒ग्ने॑ । शुचयः॑ । तव॑ । शु॒क्राः । भ्राज॑न्तः । ईर॑ते ॥ तव॑ ।

ज्योती॑ष्णि । अ॒र्चयः॑ ॥ आ॒यु॒र्दा इत्यायुः॑ – दाः । अ॒ग्ने । अ॒सि॒ ।  
आयुः॑ । मे॒ । 19 (50)

**TS 1.5.5.4**

देहि॑ वर्चो॑दा अ॒ग्ने ऽसि॑ वर्चो॑ मे देहि॑ तनू॒पा अ॒ग्ने ऽसि॑ तनु॒वं मे  
पा॒ह्यग्ने॑ यन्मे॑ तनु॒वा ऊ॒नं तन्म॒ आ पृ॒ण चि॒त्राव॑सो स्व॒स्ति ते॑  
पा॒रम॑शीयेन्धा॒नास्त्वा श॒त॒ हिमा॑ द्यु॒मन्तः॑ समि॒धीम॑हि वय॑स्वन्तो  
वय॑स्कृतं॒ यश॑स्वन्तो यश॑स्कृतं॒ सु॒वीरा॑सो अदा॑भ्यं ।

अ॒ग्ने स॑प॒त्नदं॑भनं॒ व॒र्षि॑ष्ठे अधि॒ नाके॑ ॥

सं त्वम॑ग्ने॒ सूर्य॑स्य॒ वर्च॑सा ( ) ऽग॒थाः सम॑षीणा॒ स्तुते॑न  
सं प्रि॒येण॑ धाम्ना॑ ।

त्वम॑ग्ने॒ सूर्य॑वर्चा॒ असि॑ सं मा॒मायु॑षा॒ वर्च॑सा प्र॒जया॑ सृज ॥ 20

**TS 1.5.5.4 (Padam)**

देहि॑ । वर्चो॑दा इति॑ वर्चः॑ – दाः । अ॒ग्ने । अ॒सि॒ । वर्चः॑ । मे॒ । देहि॑ ।  
तनु॒पा इति॑ तनू॒ – पाः । अ॒ग्ने । अ॒सि॒ । तनु॒वम् । मे॒ । पा॒हि॒ ।  
अ॒ग्ने॑ । यत् । मे॒ । तनु॒वाः॑ । ऊ॒नम् । तत् । मे॒ । एति॑ । पृ॒ण ।  
चि॒त्राव॑सो इति॑ चि॒त्र – व॒सो । स्व॒स्ति । ते॒ । पा॒रम् । अ॒शीय॑ ।

इ॒न्धा॒नाः । त्वा॒ । श॒तम् । हि॒माः । द्यु॒मन्त॒ इति॑ द्यु॒- मन्तः॑ । स॒मि॒ति ।  
 इ॒धी॒म॒हि । व॒यस्व॑न्तः । व॒यस्कृ॑तमि॒ति व॒यः-कृ॑तम् । य॒शस्व॑न्तः ।  
 य॒शस्कृ॑तमि॒ति य॒शः - कृ॑तम् । सु॒वी॒रा॒स इति॑ सु॒- वी॒रा॒सः ।  
 अ॒दा॒भ्यम् ॥ अ॒ग्ने॑ । स॒प॒त्न॒दं॒भ॒नमि॑ति स॒प॒त्न॒- दं॒भ॒नम् । व॒र्षि॑ष्ठे ।  
 अ॒धी॒ति । ना॒के ॥ स॒मि॒ति । त्वम् । अ॒ग्ने॑ । सूर्य॑स्य । व॒र्च॒सा ( ) ।  
 अ॒ग॒थाः । स॒मि॒ति । ऋ॒षी॑णाम् । स्तु॒तेन॑ । स॒मि॒ति । प्रि॒येण॑ । धा॒म्ना ॥  
 त्वम् । अ॒ग्ने॑ । सूर्य॑वर्चा इति॑ सूर्य॑- व॒र्चाः । अ॒सि॒ । स॒मि॒ति ।  
 मा॒म् । आ॒यु॒षा । व॒र्च॒सा । प्र॒ज॒येति॑ प्र॒- ज॒या॑ । सृ॒ज ॥ 20 (67)

(आ॒हु॒व॒द्ध्यै-पोष॑र् र॒यिं-मे॒-व॒र्च॒सा-स॒प्त॒द॒श च॑ ) (A5)

**TS 1.5.6.1**

सं प॒श्या॑मि प्र॒जा अ॒ह-मि॑डप्र॒ज॒सो मा॒न॒वीः ।

स॒र्वा भ॑वन्तु नो गृ॒हे ॥

अ॒ंभः॒ स्था॒म्भो॑ वो भ॒क्षी॒य॒ महः॑ स्थ॒ महो॑ वो भ॒क्षी॒य॒ सहः॑ स्थ॒ सहो॑  
 वो भ॒क्षी॒यो॒र्जः॒ स्थो॒र्जँ वो॑ भ॒क्षी॒य॒ रेव॑ती र॒म॒द्ध्व-म॒स्मिन्

लो॒के॑ ऽस्मिन् गो॒ष्ठे॑ ऽस्मिन् क्ष॒ये॑ ऽस्मिन् यो॒ना॒वि॒है॒व स्ते॒तो मा ऽप॑  
गा॒त ब॒ह्वी॒र्मे भू॒यास्त॑ – [ ] 21

**TS 1.5.6.1 (Padam)**

स॒मि॒ति॑ । प॒श्या॒मि॑ । प्र॒जा इति॑ प्र – जाः । अ॒हम् । इ॒डप्र॒जस॑  
इ॒ती॒ड – प्र॒जसः॑ । मा॒न॒वीः ॥ सर्वाः॑ । भ॒वन्तु॑ । नः । गृ॒हे ॥ अ॒भः ।  
स्थ । अ॒म्भः । वः । भ॒क्षी॒य । महः॑ । स्थ । महः॑ । वः । भ॒क्षी॒य ।  
सहः॑ । स्थ । सहः॑ । वः । भ॒क्षी॒य । ऊ॒र्जः । स्थ । ऊ॒र्जम् । वः ।  
भ॒क्षी॒य । रे॒वतीः॑ । र॒म॒ध्वम् । अ॒स्मिन् । लो॒के । अ॒स्मिन् । गो॒ष्ठ  
इति॑ गो॒-स्थे॑ । अ॒स्मिन् । क्ष॒ये॑ । अ॒स्मिन् । यो॒नौ । इ॒ह । ए॒व ।  
स्त । इ॒तः । मा । अ॒पे॒ति॑ । गा॒त । ब॒ह्वीः॑ । मे । भू॒यास्त॑ । 21 (50)

**TS 1.5.6.2**

स॒ं॒हि॒ता ऽसि॑ वि॒श्वरू॒पी॒रा मो॒र्जा वि॒शा ऽऽगौ॑प॒त्ये॒नाऽऽ रा॒यस्पो॑षेण  
सह॑स्रपोषं॑ वः पु॒ष्या॒सं म॒यि वो॒ रा॒यः श्र॑यन्तां ॥  
उ॒प त्वा ऽग्ने॑ दि॒वेदि॒वे दो॑षावस्तर्द्धि॒या व॒यं ।  
न॒मो भ॑रन्त ए॒मसि॑ ॥  
रा॒जन्त॑म॒ध्वरा॑णां गो॒पा॒मृ॒तस्य॑ दी॒दिवि॑ ।

वर्द्धमान॑ स्वे॑ दमे॑ ॥

स नः॑ पि॒तेव॑ सू॒नवे॑ ऽग्ने॑ सूपा॒यनो॑ भव ।

**सच॑स्वा नः स्वस्तये॑ ॥ अग्ने॑ – [ ] 22**

**TS 1.5.6.2 (Padam)**

स॒ह॒हि॒तेति॑ सं – हि॒ता । अ॒सि॒ । वि॒श्वरू॒पीरि॑ति॒ विश्व॑ – रू॒पीः ।  
ए॒ति॒ । मा॒ । ऊ॒र्जा॒ । वि॒श॒ । ए॒ति॒ । गौ॒प॒त्येन॑ । ए॒ति॒ । रा॒यः॑ । पो॒षेण॑ ।  
सह॑स्रपोषमि॒ति सह॑स्र – पो॒षम् । वः॒ । पु॒ष्या॒सम् । म॒यि॑ । वः॒ ।  
रा॒यः॑ । श्रय॑न्ताम् ॥ उ॒पेति॑ । त्वा॒ । अ॒ग्ने॒ । दि॒वेदि॑व इति॒ दि॒वे–दि॒वे ।  
दोषा॑वस्तरि॒ति दोषा॑–वस्तः॒ । धि॒या॒ । व॒यम् ॥ नमः॑ । भ॒रन्तः॑ । ए॒ति॒ ।  
इ॒म॒सि॒ ॥ रा॒ज॒न्तम् । अ॒ध्व॒राणा॑म् । गो॒पामि॑ति॒ गो–पा॑म् । ऋ॒त॒स्य॑ ।  
दी॒दि॒विम् ॥ वर्द्ध॑मानम् । स्वे॑ । दमे॑ ॥ सः॒ । नः॒ । पि॒ता । इ॒व ।  
सू॒नवे॑ । अ॒ग्ने॑ । सू॒पा॒य॒न इति॑ सु – उ॒पा॒य॒नः॒ । भ॒व ॥ सच॑स्व ।  
नः॒ । स्वस्तये॑ ॥ अ॒ग्ने॑ । **22 (50)**

**TS 1.5.6.3**

त्वं नो॑ अ॒न्तमः॑ ।

उ॒त त्रा॒ता शि॒वो भ॑व वरू॒त्थ्यः॑ ॥

तं त्वा शोचिष्ठ दीदिवः ।

सुम्नाय नूनमीमहे सखिभ्यः ॥

वसुरग्निर् वसुश्रवाः ।

**अच्छा** नक्षि द्युमत्तमो रयिं दाः ॥

ऊर्जा वः पश्याम्यूर्जा मा पश्यत रायस्पोषेण वः पश्यामि रायस्पोषेण  
मा पश्यतेडाः स्थ मधुकृतः स्योना माऽऽ विशतेरा मदः ।

सहस्रपोषं वः पुष्यासं – [ ] 23

**TS 1.5.6.3 (Padam)**

त्वम् । नः । अन्तमः ॥ उत । त्राता । शिवः । भव । वरूथ्यः ॥ तम् ।

त्वा । शोचिष्ठ । दीदिवः ॥ सुम्नाय । नूनम् । ईमहे ।

सखिभ्य इति सखि – भ्यः ॥ वसुः । अग्निः । वसुश्रवा इति

वसु – श्रवाः ॥ अच्छ । नक्षि । द्युमत्तम इति द्युमत् – तमः ।

रयिम् । दाः ॥ ऊर्जा । वः । पश्यामि । ऊर्जा । मा । पश्यत । रायः ।

पोषेण । वः । पश्यामि । रायः । पोषेण । मा । पश्यत । इडाः । स्थ ।



म॒धुकृ॒त इति॑ मधु॒ – कृ॒तः । स्यो॒नाः । मा॒ । ए॒ति । वि॒शत॑ । इ॒राः ।  
मदः॑ ॥ स॒हस्र॑पोषमि॒ति स॒हस्र॑ – पो॒षम् । वः । पु॒ष्यास॑म् । 23 (50)

**TS 1.5.6.4**

मयि॑ वो रा॒यः श्रय॑न्तां ॥  
तथ्स॑वि॒तुर्व॑रे॒ण्यं भ॒र्गो दे॒वस्य॑ धीम॒हि ।  
धि॒यो यो नः॑ प्र॒चोद॑यात् ॥  
सो॒मान॑ꣳ स्वर॑णं कृ॒णुहि॑ ब्र॒ह्मण॑स्पते ।  
कक्षी॑वन्तं यँ औ॒शिजं॑ ॥  
कदा॑ च॒न स्त॒रीर॑सि॒ नेन्द्र॑ स॒श्वसि॑ दा॒शुषे॑ ।  
उपो॑पे॒न्नु म॑घव॒न्भूय॑ इ॒न्नु ते॒ दानं॑ दे॒वस्य॑ पृ॒च्यते॑ ॥  
परि॑ त्वा ऽग्ने॒ पुरं॑ व॒यं वि॒प्रꣳ स॒हस्य॑ धीम॒हि ।  
धृष॑द्वर्णं ( ) दि॒वेदि॑वे भे॒त्तारं॑ भ॒ङ्गुरा॑वतः ॥  
अग्ने॑ गृ॒हप॑ते सु॒गृह॑पति॒रहं॑ त्वया॒ गृह॑पति॒ना भू॒यासꣳ सु॒गृह॑पति॒र्मया॒  
त्वं गृ॒हप॑ति॒ना भू॒याः श॒तꣳ हि॒मास्त॑मा॒शिष॑मा श॒से तन्त॑वे  
ज्योति॑ष्मतीं॒ तामा॑शिष॒मा श॒से ऽमु॑ष्मै ज्योति॑ष्मतीं ॥ 24

**TS 1.5.6.4 (Padam)**

मयि॑ । वः॑ । रायः॑ । श्रय॑न्ता॒म् ॥ तत् । स॒वि॒तुः॑ । वरै॑ण्यम् । भर्गः॑ ।  
 दे॒वस्य॑ । धी॒महि॑ ॥ धि॒यः॑ । यः । नः॑ । प्र॒चो॒दया॒दिति॑ प्र-चो॒दया॑त् ॥  
 सो॒मान॑म् । स्वर॑णम् । कृ॒णु॒हि । ब्र॒ह्म॒णः॑ । प॒ते ॥  
 क॒क्षी॒वन्त॑मि॒ति क॒क्षी॑ – व॒न्तम् । यः । औ॒शि॒जम् ॥ क॒दा । च॒न ।  
 स्त॒रीः । अ॒सि । न । इ॒न्द्र । स॒श्र॒सि । दा॒शु॒षे ॥ उ॒पो॒पेत्यु॑प – उ॒प ।  
 इत् । नु । म॒घव॑न्निति॑ म॒घ – व॒न् । भू॒यः । इत् । नु । ते । दान॑म् ।  
 दे॒वस्य॑ । पृ॒च्य॒ते ॥ प॒री॒ति । त्वा । अ॒ग्ने । पु॒रम् । व॒यम् । वि॒प्रम् ।  
 स॒हस्य॑ । धी॒महि॑ ॥ धृ॒ष॒द्वर्ण॑मि॒ति धृ॒षत् – वर्ण॑म् ( ) । दि॒वेदि॑व इति॑  
 दि॒वे – दि॒वे । भे॒त्ता॒रम् । भ॒ङ्गुरा॑व॒त इति॑ भ॒ङ्गुर॑-व॒तः ॥ अ॒ग्ने ।  
 गृ॒ह॒प॒त इति॑ गृ॒ह – प॒ते । सु॒गृ॒ह॒प॒तिरिति॑ सु – गृ॒ह॒प॒तिः । अ॒हम् ।  
 त्वया॑ । गृ॒ह॒प॒ति॒नेति॑ गृ॒ह – प॒ति॒ना । भू॒या॒सम् । सु॒गृ॒ह॒प॒तिरिति॑  
 सु – गृ॒ह॒प॒तिः । मया॑ । त्वम् । गृ॒ह॒प॒ति॒नेति॑ गृ॒ह – प॒ति॒ना । भू॒याः ।  
 श॒तम् । हि॒माः । ताम् । आ॒शि॒ष॒मित्या॑ – शि॒षम् । ए॒ति । शा॒से ।  
 तन्त॑वे । ज्यो॒ति॒ष्म॒तीम् । ताम् । आ॒शि॒ष॒मित्या॑ – शि॒षम् । ए॒ति ।

शा॒से । अ॒मुष्मै॑ । ज्योति॑ष्मतीम् ॥ 24 (79)

(भू॒यास्त॒-स्वस्तये॑ऽग्ने॒-पुष्या॑सं-धृष॑द्वर्ण॒-मेका॒न्नत्रि॒ंशच्च॑ ) (A6)

**TS 1.5.7.1**

अय॑ज्ञो वा ए॒ष यो॑ ऽसा॒मोप॑प्रयन्तो॒ अ॒ध्वर॑मित्याह॒ स्तोम॑मेवास्मै  
युन॑क्त्युपेत्याह॒ प्र॒जा वै प॒शव॑ उपे॒मं लो॒कं प्र॒जामे॒व प॒शूनि॑मं  
लो॒कमु॒पैत्य॑स्य प्र॒त्नाम॑नु द्युत॑मित्याह सुव॒र्गो वै लो॒कः प्र॒त्नः  
सुव॑र्गमे॒व लो॒कं स॒मारो॑हत्यग्नि॒र्मूर्ध्ना॑ दि॒वः

क॒कुदि॑त्याह मूर्द॒धान- [ ] 25

**TS 1.5.7.1 (Padam)**

अय॑ज्ञः । वै । ए॒षः । यः । अ॒सा॒मा । उ॒प॒प्र॒यन्त॑ इत्यु॒प - प्र॒यन्तः॑ ।  
अ॒ध्वर॑म् । इति॑ । आ॒ह । स्तोम॑म् । ए॒व । अ॒स्मै । यु॒न॒क्ति॑ । उ॒पेति॑ ।  
इति॑ । आ॒ह । प्र॒जेति॑ प्र - जा । वै । प॒शवः॑ । उ॒पेति॑ । इ॒मम् ।  
लो॒कम् । प्र॒जामि॑ति प्र - जा॒म् । ए॒व । प॒शून् । इ॒मम् । लो॒कम् ।  
उ॒पेति॑ । ए॒ति । अ॒स्य । प्र॒त्नाम् । अ॒न्वि॑ति । द्यु॒तम् । इति॑ । आ॒ह ।  
सुव॑र्ग इति॑ सुवः - गः । वै । लो॒कः । प्र॒त्नः । सुव॑र्गमि॒ति  
सुवः॑ - गम् । ए॒व । लो॒कम् । स॒मारो॑हतीति॑ सं - आ॒रो॑हति ।

अ॒ग्निः । मूर्द्॑धा । दि॒वः । क॒कुत् । इति॑ । आ॒ह ।

मूर्द्धानम् ॥ 25 (50)

**TS 1.5.7.2**

मे॒वैन॑ स॒माना॑नां॒ करो॑त्यथो॒ दे॒वलो॑कादे॒व म॑नुष्यलो॒के प्र॑ति  
तिष्ठ॑त्यय॒मिह॑ प्रथ॒मो धा॑यि धा॒तृभि॑रित्या॒ह मुख्य॑मे॒वैनं॑ करोत्यु॒भा  
वा॒मिन्द्रा॑ग्नी आ॒हुव॑द्ध्य॒ इत्या॑हौजो॒ बल॑मे॒वाव रु॑न्धे ऽयं॒ ते यो॑निर्.  
ऋ॒त्विय॑ इत्या॒ह प॒शवो॑ वै र॒यिः प॒शूने॒वाव रु॑न्धे षड्भि॑रुप

तिष्ठते षड् वा – [ ] 26

**TS 1.5.7.2 (Padam)**

ए॒व । ए॒नम् । स॒माना॑नाम् । क॒रोति॑ । अथो॒ इति॑ । दे॒वलो॑कादि॒ति  
दे॒व – लो॒कात् । ए॒व । म॒नुष्य॑लो॒क इति॑ म॒नुष्य॑ – लो॒के । प्र॑तीति ।  
तिष्ठ॑ति । अ॒यम् । इ॒ह । प्रथ॑मः । धा॑यि । धा॒तृभि॑रिति॒ धा॒तृ – भिः॑ ।  
इति॑ । आ॒ह । मुख्य॑म् । ए॒व । ए॒नम् । क॒रोति॑ । उ॒भा । वा॒म् ।  
इन्द्रा॑ग्नी इतीन्द्र – अ॒ग्नी । आ॒हुव॑द्ध्यै । इति॑ । आ॒ह । ओजः॑ ।  
बल॑म् । ए॒व । अ॒वेति॑ । रु॒न्धे । अ॒यम् । ते । यो॑निः । ऋ॒त्वियः॑ ।  
इति॑ । आ॒ह । प॒शवः॑ । वै । र॒यिः । प॒शून् । ए॒व । अ॒वेति॑ । रु॒न्धे ।

षड्भि॑रिति॒ षट् – भिः॑ । उपेति॑ । तिष्ठते॑ । षट् । वै । 26 (50)

**TS 1.5.7.3**

ऋ॒तव॑ ऋ॒तुष्वे॒व प्र॑ति तिष्ठति॑ षड्भि॑रुत्तरा॒भिरु॑प तिष्ठते॑ द्वाद॑श  
संप॑द्यन्ते द्वाद॑श मा॒साः सँव॑त्सरः॒ सम्॑व॒त्सर॒ ए॒व प्र॑ति तिष्ठति॑ यथा॒  
वै पु॒रुषो॑ ऽश्वो॒ गौर्जी॑र्यत्ये॒व-म॒ग्निरा॑हि॒तो जी॑र्यति॒ सम्॑व॒त्सर॒स्य  
पर॑स्तादा॒ग्निपा॑वमानी॒भि-रु॑प तिष्ठते॑ पुन॑र्नव-मे॒वैन-म॒जरं॑ करोत्यथो॑  
पुना॑त्ये॒वोप॑ तिष्ठते॑ यो॒ग ए॒वास्व॑यैष॒ उप॑ तिष्ठते॑ – [ ] 27

**TS 1.5.7.3 (Padam)**

ऋ॒तवः॑ । ऋ॒तुषु॑ । ए॒व । प्र॑तीति॑ । तिष्ठति॑ । षड्भि॑रिति॒ षट् – भिः॑ ।  
उत्तरा॑भिरित्युत् – त॒राभिः॑ । उपेति॑ । तिष्ठते॑ । द्वाद॑श । समि॑ति ।  
प॒द्यन्ते॑ । द्वाद॑श । मा॒साः । सम्॑व॒त्सर॒ इति॑ सं – व॒त्सरः॑ ।  
सम्॑व॒त्सर॒ इति॑ सं – व॒त्सरे॑ । ए॒व । प्र॑तीति॑ । तिष्ठति॑ । यथा॑ । वै ।  
पु॒रुषः॑ । अ॒श्वः । गौः॑ । जी॑र्यति॒ ए॒वम् । अ॒ग्निः ।  
आ॒हि॒त इ॒त्या – हि॒तः॑ । जी॑र्यति॒ सम्॑व॒त्सर॒स्येति॑ सं-व॒त्सर॒स्य ।  
पर॑स्तात् । आ॒ग्निपा॑वमानी॒भिरित्या॑ग्नि – पा॒वमा॑नीभिः॑ । उपेति॑ ।  
तिष्ठते॑ । पुन॑र्नवमि॑ति पुनः-न॒वम् । ए॒व । ए॒नम् । अ॒जर॑म् । करो॑ति ।

अथो॒ इति॑ । पु॒नाति॑ । ए॒व । उपेति॑ । ति॒ष्ठते॑ । योगः॑ । ए॒व । अ॒स्य॒ ।  
ए॒षः । उपेति॑ । ति॒ष्ठते॑ । 27 (50)

**TS 1.5.7.4**

दम॑ ए॒वास्यै॑ष उप॑ ति॒ष्ठते॑ या॒च्चै॒वास्यै॑षोप॑ ति॒ष्ठते॑ यथा॑ पा॒पीया॑ञ्छ्रे॒यस॑  
आ॒हत्य॑ नम॒स्यति॑ ता॒दृगे॒व तदा॑यु॒र्दा अ॒ग्ने ऽस्या॑यु॒र्मे दे॒हीत्या॑हा ऽऽयु॒र्दा  
ह्येष॑ वर्चो॒दा अ॒ग्ने ऽसि॑ वर्चो॒ मे दे॒हीत्या॑ह वर्चो॒दा ह्येष॑ त॒नूपा॑ अ॒ग्ने  
ऽसि॑ त॒नुवं॑ मे पा॒हीत्या॑ह – [ ] 28

**TS 1.5.7.4 (Padam)**

दमः॑ । ए॒व । अ॒स्य॒ । ए॒षः । उपेति॑ । ति॒ष्ठते॑ । या॒च्चा॑ । ए॒व ।  
अ॒स्य॒ । ए॒षा॑ । उपेति॑ । ति॒ष्ठते॑ । यथा॑ । पा॒पीया॑न् । श्रे॒यसे॑ ।  
आ॒हत्येत्या॑ – ह॒त्य॑ । नम॒स्यति॑ । ता॒दृक् । ए॒व । तत् ।  
आ॒युर्दा॑ इत्या॒युः – दाः॑ । अ॒ग्ने । अ॒सि॒ । आ॒युः । मे॒ । दे॒हि॒ । इति॑ ।  
आ॒ह॒ । आ॒युर्दा॑ इत्या॒युः – दाः॑ । हि॒ । ए॒षः । वर्चो॒दा इति॑  
वर्चः॑ – दाः॑ । अ॒ग्ने । अ॒सि॒ । वर्चः॑ । मे॒ । दे॒हि॒ । इति॑ । आ॒ह॒ ।  
वर्चो॒दा इति॑ वर्चः॑ – दाः॑ । हि॒ । ए॒षः । त॒नूपा॑ इति॑ त॒नू – पाः॑ ।  
अ॒ग्ने । अ॒सि॒ । त॒नुव॑म् । मे॒ । पा॒हि॒ । इति॑ । आ॒ह॒ । 28 (50)

**TS 1.5.7.5**

त॒नू॒पा ह्येषो॑ ऽग्ने॒ यन्मे॑ त॒नु॒वा ऊ॒नं तन्म॑ आ पृ॒णे॒त्याह॑ यन्मे॑  
प्र॒जायै॑ प॒शूना॑मू॒नं तन्म॑ आ पू॒रये॑ति॒ वावै॑तदाह॒चित्रा॑वसो॒ स्व॒स्ति ते॑  
पा॒रम॑शी॒येत्या॑ह॒ रात्रि॑र्वै चि॒त्राव॑सु॒रव्यु॑ष्ट्यै॒ वा ए॒तस्यै॑ पु॒रा  
ब्रा॒ह्म॒णा अ॒भैषु॑व्यु॒ष्टिमे॒वाव॑ रु॒न्ध इ॒न्धा॒नास्त्वा॑ श॒तम् – [ ] 29

**TS 1.5.7.5 (Padam)**

त॒नू॒पा इति॑ त॒नू – पाः॑ । हि॑ । ए॒षः । अ॒ग्ने॑ । यत् । मे॒ । त॒नु॒वाः ।  
ऊ॒नम् । तत् । मे॒ । ए॒ति॑ । पृ॒ण॒ । इति॑ । आ॒ह॒ । यत् । मे॒ । प्र॒जा॒या  
इति॑ प्र – जा॒यै॑ । प॒शूना॑म् । ऊ॒नम् । तत् । मे॒ । ए॒ति॑ । पू॒रय॑ ।  
इति॑ । वाव॑ । ए॒तत् । आ॒ह॒ । चि॒त्राव॑सो॒ इति॑ चि॒त्र – व॒सो॒ ।  
स्व॒स्ति । ते॒ । पा॒रम् । अ॒शी॒य॒ । इति॑ । आ॒ह॒ । रा॒त्रिः॒ । वै॒ ।  
चि॒त्राव॑सु॒रिति॑ चि॒त्र – व॒सुः॒ । अ॒व्यु॑ष्ट्या॒ इत्य॑वि – उ॒ष्ट्यै॒ । वै॒ ।  
ए॒तस्यै॑ । पु॒रा । ब्रा॒ह्म॒णाः । अ॒भैषुः॑ । व्यु॒ष्टि॒मिति॑ वि – उ॒ष्टिम् । ए॒व ।  
अ॒वेति॑ । रु॒न्धे॒ । इ॒न्धा॒नाः । त्वा॒ । श॒तम् । 29 (50)

**TS 1.5.7.6**

हिमा॑ इत्या॑ह श॒तायुः॑ पु॒रुषः॑ श॒तेन्द्रि॑य आयु॑ष्येवेन्द्रि॒ये प्रति॑ तिष्ठत्येषा॒  
वै सू॒र्मी क॑र्णकावत्येतया॑ ह स्म॒ वै दे॒वा असु॑राणां॒ शत॑तर्॒हाऽ  
स्तृ॑हन्ति॒ यदे॒तया॑ स॒मिध॑मादधाति॒ वज्र॑मेवैतच्छत॒घ्नीं य॑जमानो  
भ्रातृ॑व्याय॒ प्र हर॑ति स्तृ॒त्या अ॑छं॒बट्कार॑ सं त्वम॒ग्ने सूर्य॑स्य॒ वर्च॑सा  
ऽग॒था इत्या॑हैतत् त्वमसीदम॒हं ( ) भू॒यास॑मिति॒ वावै॑तदाह॒ त्वम॒ग्ने  
सूर्य॑वर्चा॒ असी॑त्याहाऽऽशिष॑मेवैता॒मा शा॑स्ते ॥ 30

**TS 1.5.7.6 (Padam)**

हिमाः॑ । इति॑ । आ॒ह । श॒तायु॑रिति॒ शत॑ – आ॒युः । पु॒रुषः॑ । श॒तेन्द्रि॑य  
इति॑ शत॑ – इन्द्रि॒यः । आ॒युषि॑ । ए॒व । इन्द्रि॒ये । प्रती॑ति । तिष्ठ॒ति ।  
ए॒षा । वै । सू॒र्मी । क॑र्णकावतीति॒ कर्ण॑क-वती॒ । ए॒तया॑ । ह॒ । स्म॒ ।  
वै । दे॒वाः । असु॑राणाम् । श॒ततर्॑हानिति॒ शत॑ – तर्॒हान् ।  
तृ॑हन्ति॒ । यत् । ए॒तया॑ । स॒मिध॑मिति॒ सं-इ॒धम् ।  
आ॒दधा॑तीत्या॒ – दधा॑ति । वज्र॑म् । ए॒व । ए॒तत् । श॒तघ्नी॑मिति॒  
शत॑ – घ्नीम् । य॑जमानः । भ्रातृ॑व्याय । प्रेति॑ । हर॒ति । स्तृ॒त्यै ।  
अ॑छं॒बट्कार॑मित्यछं॒बट् – का॒रम् । स॒मिति॑ । त्वम् । अ॒ग्ने । सूर्य॑स्य ।



वर्चसा । अ॒ग॒थाः । इति । आ॒ह । ए॒तत् । त्वम् । अ॒सि । इ॒दम् ।  
अ॒हम् ( ) । भू॒या॒सम् । इति । वाव । ए॒तत् । आ॒ह । त्वम् । अ॒ग्ने ।  
सूर्य॑वर्चा इति सूर्य॑ – वर्चाः । अ॒सि । इति । आ॒ह ।  
आ॒शि॒ष॒मि॒त्या॑ – शि॒ष॒म् । ए॒व । ए॒ता॒म् । एति । शा॒स्ते ॥ 30 (66)  
(मू॒र्ध्ना॒न॒७-ष॒ड्वा-ए॒ष उप॑ तिष्ठते-पा॒ही॒त्या॒ह-श॒त-म॒ह॒७

षोड॑श च) (A7)

**TS 1.5.8.1**

सं प॒श्या॒मि प्र॒जा अ॒ह॒मि॒त्या॒ह या॒वन्त॑ ए॒व ग्रा॒म्याः प॒शव॑स्ता॒नेवा॒व  
रु॒न्धे ऽम्भः॑ स्था॒म्भो वो भ॒क्षी॒ये॒त्या॒हा॒म्भो ह्ये॒ता म॒हः स्थ॒ महो॑ वो  
भ॒क्षी॒ये॒त्या॒ह म॒हो ह्ये॒ताः स॒हः स्थ॒ सहो॑ वो भ॒क्षी॒ये॒त्या॒ह स॒हो  
ह्ये॒ता ऊ॒र्जः स्थो॒र्जो॑ वो भ॒क्षी॒ये॒त्या॒ – [ ] 31

**TS 1.5.8.1 (Padam)**

स॒मि॒ति । प॒श्या॒मि । प्र॒जा इति॑ प्र – जाः । अ॒हम् । इति॑ । आ॒ह ।  
या॒वन्तः । ए॒व । ग्रा॒म्याः । प॒शवः॑ । तान् । ए॒व । अ॒वेति॑ । रु॒न्धे ।  
अं॒भः । स्थ॒ । अं॒भः । वः । भ॒क्षी॒य । इति॑ । आ॒ह । अं॒भः । हि ।  
ए॒ताः । म॒हः । स्थ॒ । म॒हः । वः । भ॒क्षी॒य । इति॑ । आ॒ह । म॒हः ।

हि । ए॒ताः । स॒हः । स्थ॒ । स॒हः । वः । भ॒क्षी॒य । इति॑ । आ॒ह ।

स॒हः । हि । ए॒ताः । ऊ॒र्जः । स्थ॒ । ऊ॒र्जम् । वः । भ॒क्षी॒य ।

इति॑ । 31 (50)

**TS 1.5.8.2**

–हो॒र्जो ह्ये॒ता रे॒वती॑ र॒म॒ध्व॒मित्या॑ह प॒शवो॑ वै रे॒वतीः॑ प॒शून्वे॒वात्मन्॑  
र॒मय॑त इ॒हैव॑ स्ते॒तो मा ऽप॑ गा॒तेत्या॑ह ध्रु॒वा ए॒वैना॑ अन॒पगाः॑ कुरु॒त  
इष्ट॑क॒चिद्–वा अ॒न्यो ऽग्निः॑ प॒शुचि॑दन्यः स॒ं॒हि॒ता ऽसि॑ विश्व॒रूपी॑रिति॑  
व॒थ्स॒मभि॑ मृ॒शत्यु॑पै॒वैनं॑ धत्ते प॒शुचि॑तमे॒नं कुरु॑ते प्र – [ ] 32

**TS 1.5.8.2 (Padam)**

आ॒ह । ऊ॒र्जः । हि । ए॒ताः । रे॒वतीः॑ । र॒म॒ध्वम् । इति॑ । आ॒ह ।  
प॒शवः॑ । वै । रे॒वतीः॑ । प॒शून् । ए॒व । आ॒त्मन् । र॒मय॑ते । इ॒ह । ए॒व ।  
स्त । इ॒तः । मा । अ॒पेति॑ । गा॒त । इति॑ । आ॒ह । ध्रु॒वाः । ए॒व ।  
ए॒नाः । अन॒पगा॑ इत्य॒नप–गाः॑ । कुरु॑ते । इष्ट॑क॒चिदि॒तीष्ट॑क–चित् ।  
वै । अ॒न्यः । अ॒ग्निः । प॒शुचि॑दिति॑ प॒शु – चि॒त् । अ॒न्यः ।  
स॒ं॒हि॒तेति॑ सं – हि॒ता । अ॒सि । वि॒श्वरूपी॑रिति॑ विश्व – रूपीः ।  
इति॑ । व॒थ्सम् । अ॒भीति॑ । मृ॒शति॑ । उ॒पेति॑ । ए॒व । ए॒नम् । ध॒त्ते ।

प॒शु॒चि॒त॒मि॒ति॒ प॒शु॒ – चि॒त॒म् । ए॒न॒म् । कु॒रु॒ते । प्रे॒ति॒ । 32 (50)

**TS 1.5.8.3**

वा ए॒षो ऽस्मा॒ल्लो॒का॒च्य॒व॒ते॒ य आ॒ह॒व॒नी॒य॒मु॒प ति॒ष्ठ॒ते॒ गा॒र्ह॒प॒त्य॒-  
मु॒प॒ति॒ष्ठ॒ते॒ ऽस्मि॒न्ने॒व लो॒के॒ प्र॒ति ति॒ष्ठ॒त्य॒थो॒ गा॒र्ह॒प॒त्या॒यै॒व नि हु॒ते॒  
गा॒य॒त्री॒भि॒रु॒प ति॒ष्ठ॒ते॒ ते॒जो॒ वै गा॒य॒त्री॒ ते॒ज ए॒वा॒त्म॒न् ध॒त्ते॒ ऽथो॒ यदे॒तं  
तृ॒च॒म॒न्वा॒ह स॒न्त॒त्यै॒ गा॒र्ह॒प॒त्यं॒ वा अ॒नु द्वि॒पा॒दो वी॒राः प्र जा॒य॒न्ते॒  
य ए॒वं वि॒द्वान् द्वि॒प॒दा॒भि॒र् गा॒र्ह॒प॒त्य॒-मु॒प॒ति॒ष्ठ॒त – [ ] 33

**TS 1.5.8.3 (Padam)**

वै । ए॒षः । अ॒स्मात् । लो॒कात् । च्य॒व॒ते॒ । यः ।  
आ॒ह॒व॒नी॒य॒मि॒त्या – ह॒व॒नी॒य॒म् । उ॒प॒ति॒ष्ठ॒त इ॒त्यु॒प – ति॒ष्ठ॒ते॒ ।  
गा॒र्ह॒प॒त्य॒मि॒ति॒ गा॒र्ह॒ – प॒त्य॒म् । उ॒पे॒ति॒ । ति॒ष्ठ॒ते॒ । अ॒स्मि॒न् ।  
ए॒व । लो॒के॒ । प्र॒ती॒ति॒ । ति॒ष्ठ॒ति॒ । अ॒थो इ॒ति॒ ।  
गा॒र्ह॒प॒त्या॒ये॒ति॒ गा॒र्ह॒ – प॒त्या॒य॒ । ए॒व । नी॒ति॒ । हु॒ते॒ । गा॒य॒त्री॒भिः॒ ।  
उ॒पे॒ति॒ । ति॒ष्ठ॒ते॒ । ते॒जः॒ । वै । गा॒य॒त्री॒ । ते॒जः॒ । ए॒व । आ॒त्म॒न् ।  
ध॒त्ते॒ । अ॒थो इ॒ति॒ । यत् । ए॒त॒म् । तृ॒च॒म् । अ॒न्वा॒हे॒त्य॒नु॒ – आ॒ह॒ ।  
स॒न्त॒त्या इ॒ति॒ सं – त॒त्यै॒ । गा॒र्ह॒प॒त्य॒मि॒ति॒ गा॒र्ह॒ – प॒त्य॒म् । वै ।

अ॒न्वि॒ति॒ । द्वि॒पाद॒ इति॑ द्वि – पादः॑ । वी॒राः॑ । प्रेति॑ । जा॒यन्ते॑ । यः ।  
ए॒वम् । वि॒द्वान् । द्वि॒पदा॑भि॒रिति॑ द्वि – पदा॑भिः । गा॒र्ह॒प॒त्यमि॑ति  
गा॒र्ह॒ – प॒त्यम् । उ॒प॒तिष्ठ॑त इत्यु॒प – तिष्ठ॑ते । 33 (50)

**TS 1.5.8.4**

आ ऽस्य॑ वी॒रो जा॑यत ऊ॒र्जा वः॑ प॒श्याम्यूर्जा॑ मा प॒श्यते॑त्याहा  
ऽऽशि॑षमे॒वैता॒मा शा॑स्ते तथ्स॒वितुर्वरे॑ण्यमित्याह॑ प्र॒सू॒त्यै सो॒मान॑  
स्व॒रण॑मित्याह॑ सोम॒पी॒थमे॒वाव॑ रुन्धे कृ॒णु॒हि ब्र॑ह्मणस्प॒त इत्या॑ह  
ब्र॒ह्मव॑र्च॒समे॒वाव॑ रुन्धेक॒दा च॒न स्त॒रीर॑सीत्याह॑ न स्त॒रीꣳ  
रा॒त्रिंँ व॑सति – [ ] 34

**TS 1.5.8.4 (Padam)**

ए॒ति । अ॒स्य॑ । वी॒रः॑ । जा॒यते॑ । ऊ॒र्जा । वः॑ । प॒श्यामि॑ । ऊ॒र्जा ।  
मा । प॒श्यत॑ । इति॑ । आ॒ह॒ । आ॒शि॒षमि॑त्या – शि॒षम् । ए॒व ।  
ए॒ताम् । ए॒ति॑ । शा॒स्ते॑ । तत् । स॒वि॒तुः॑ । वरे॑ण्यम् । इति॑ । आ॒ह॒ ।  
प्र॒सू॒त्या इति॑ प्र – सू॒त्यै । सो॒मान॑म् । स्व॒रण॑म् । इति॑ । आ॒ह॒ ।  
सो॒म॒पी॒थमि॑ति सोम – पी॒थम् । ए॒व । अ॒वेति॑ । रुन्धे॑ । कृ॒णु॒हि ।  
ब्र॒ह्मणः॑ । प॒ते॑ । इति॑ । आ॒ह॒ । ब्र॒ह्मव॑र्च॒समि॑ति ब्र॒ह्म-व॑र्च॒सम् । ए॒व ।

अवेति । रुन्धे । कदा । चन । स्तरीः । असि । इति । आह । न ।  
स्तरीम् । रात्रिम् । वसति । 34 (50)

**TS 1.5.8.5**

य एवं विद्वानग्नि-मुपतिष्ठते परि त्वा अग्ने पुरं वयमित्याह  
परिधिमेवैतं परि दधात्यस्कन्दायाग्ने गृहपत इत्याह  
यथायजुरेवैतच्छतं हिमा इत्याह शतं त्वा हेमन्तानिन्धिषीयेति  
वावैतदाह पुत्रस्य नाम गृह्णात्यन्नादमेवैनं करोति तामाशिषमा शासे  
तन्तवे ज्योतिष्मतीमिति ब्रूयाद्-यस्य पुत्रो जातः स्यात्  
तेजस्व्येवास्य ब्रह्मवर्चसी पुत्रो जायते तामाशिषमा शासे ऽमुष्मै  
ज्योतिष्मती ( ) मिति ब्रूयाद्-यस्य पुत्रो जातः स्यात् तेज एवास्मिन्  
ब्रह्मवर्चसं दधाति ॥ 35

**TS 1.5.8.5 (Padam)**

यः । एवम् । विद्वान् । अग्निम् । उपतिष्ठत इत्युप – तिष्ठते । परीति ।  
त्वा । अग्ने । पुरम् । वयम् । इति । आह । परिधिमिति परि-धिम् ।  
एव । एतम् । परीति । दधाति । अस्कन्दाय । अग्ने । गृहपत इति  
गृह – पते । इति । आह । यथायजुरिति यथा – यजुः । एव ।

ए॒तत् । श॒तम् । हि॒माः । इति॑ । आ॒ह । श॒तम् । त्वा॒ । हे॒म॒न्ता॒न् ।  
 इ॒न्धि॒षी॒य । इति॑ । वा॒व । ए॒तत् । आ॒ह । पु॒त्रस्य॑ । ना॒म । गृ॒ह्णा॒ति ।  
 अ॒न्ना॒द॒मि॒त्य॒न्न – अ॒दम् । ए॒व । ए॒नम् । क॒रो॒ति । ता॒म् । आ॒शि॒ष॒  
 मि॒त्या॑ – शि॒षम् । ए॒ति । शा॒से । त॒न्त॒वे । ज्यो॒ति॒ष्म॒तीम् ( ) । इति॑ ।  
 ब्रू॒यात् । यस्य॑ । पु॒त्रः । अ॒जा॒तः । स्या॒त् । ते॒ज॒स्वी । ए॒व । अ॒स्य ।  
 ब्र॒ह्म॒व॒र्च॒सी॒ति ब्र॒ह्म – व॒र्च॒सी । पु॒त्रः । जा॒य॒ते । ता॒म् ।  
 आ॒शि॒ष॒मि॒त्या॑ – शि॒षम् । ए॒ति । शा॒से । अ॒मुष्मै॑ । ज्यो॒ति॒ष्म॒तीम् ।  
 इति॑ । ब्रू॒यात् । यस्य॑ । पु॒त्रः । जा॒तः । स्या॒त् । ते॒जः । ए॒व ।  
 अ॒स्मि॒न् । ब्र॒ह्म॒व॒र्च॒स॒मि॒ति ब्र॒ह्म – व॒र्च॒सम् । द॒धा॒ति ॥ 35 (79)  
 (ऊ॒र्जं॑ वो॒ भक्षी॑येति॒ – प्र॒ – गा॒र्ह॒प॒त्य॒मु॒प॒ति॒ष्ठ॒ते – व॒स॒ति – ज्यो॒ति॒ष्म॒ती –  
 मे॒का॒न्न॒त्रि॒ंश॒च्च) (A8)

### TS 1.5.9.1

अ॒ग्नि॒हो॒त्रं जु॒हो॒ति य॒दे॒व किं॑ च॒ यज॑मा॒नस्य॑ स्वं तस्यै॒व तद् – रे॒तः  
 सिञ्च॑ति प्र॒ज॒न॒ने प्र॒ज॒न॒नं॑ हि वा अ॒ग्नि॒रथौष॑धी॒रन्त॑गता द॒ह॒ति  
 तास्त॑तो भू॒यसीः॑ प्र जा॒य॒न्ते य॒थ्सा॒यं जु॒हो॒ति रे॒त ए॒व तथ्॑सिञ्च॑ति

प्रै॒व प्रा॒तस्त॒नेन॑ जन॒यति॑ तद्-रेतः॑ सि॒क्तं न त्वष्ट्रा ऽवि॒कृतं॑ प्र जा॒यते॑  
याव॒च्छो वै रेत॑सः सि॒क्तस्य॑ – [ ] 36

**TS 1.5.9.1 (Padam)**

अ॒ग्नि॒हो॒त्रमि॒त्यग्नि॑ – हो॒त्रम् । जु॒होति॑ । यत् । ए॒व । किम् । च ।  
यज॑मानस्य । स्वम् । तस्य॑ । ए॒व । तत् । रेतः॑ । सि॒ञ्चति॑ । प्र॒जन॑न  
इति॑ प्र – जन॑ने । प्र॒जन॑नमिति॑ प्र – जन॑नम् । हि । वै । अ॒ग्निः ।  
अथ॑ । ओष॑धीः । अ॒न्त॒गता॑ इत्य॒न्त – ग॒ताः । द॒हति॑ । ताः । ततः॑ ।  
भूय॑सीः । प्रेति॑ । जा॒यन्ते॑ । यत् । सा॒यम् । जु॒होति॑ । रेतः॑ । ए॒व ।  
तत् । सि॒ञ्चति॑ । प्रेति॑ । ए॒व । प्रा॒तस्त॒नेनेति॑ प्रातः – तने॑न ।  
ज॒न॒यति॑ । तत् । रेतः॑ । सि॒क्तम् । न । त्वष्ट्रा॑ ।  
अ॒वि॒कृत॑मित्य॒वि – कृ॒तम् । प्रेति॑ । जा॒यते॑ । याव॒च्छ इति॑  
यावत् – शः । वै । रेत॑सः । सि॒क्तस्य॑ । 36 (50)

**TS 1.5.9.2**

त्वष्ट्रा॑ रू॒पाणि॑ वि॒करोति॑ ताव॒च्छो वै तत् प्र जा॒यत॑ ए॒ष वै दै॒व्यस्त्वष्ट्रा॑  
यो यज॑ते ब॒ह्वीभि॒रुप॑ तिष्ठते॑ रेत॑स ए॒व सि॒क्तस्य॑ बहु॒शो रू॒पाणि॑ वि  
क॒रोति॑ स प्रै॒व जा॒यते॑ श्वःश्चो॑ भू॒यान् भव॑ति॒ य ए॒वं

वि॒द्वान॒ग्निमु॒पति॑ष्ठते ऽहर्दे॒वाना॒मासी॑द्-रा॒त्रिर॒सुरा॒णां ते ऽसुरा॑  
यद्-दे॒वानां॑ वि॒त्तं वे॒द्यमा॑सीत् तेन॑ सह- [ ] 37

**TS 1.5.9.2 (Padam)**

त्व॒ष्टा । रू॒पाणि॑ । वि॒क॒रोती॑ति वि - क॒रोति॑ । ताव॒च्छ इति॑  
तावत्-शः॑ । वै । तत् । प्रेति॑ । जा॒यते॑ । ए॒षः । वै । दै॒व्यः । त्व॒ष्टा ।  
यः । यज॑ते । ब॒ह्वीभिः॑ । उपेति॑ । ति॒ष्ठते॑ । रे॒तसः॑ । ए॒व । सि॒क्तस्य॑ ।  
ब॒हुश॑ इति॑ बहु - शः । रू॒पाणि॑ । वीति॑ । क॒रोति॑ । सः । प्रेति॑ ।  
ए॒व । जा॒यते॑ । श्वःश्व॑ इति॑ श्वः - श्वः । भू॒यान् । भ॒वति॑ । यः ।  
ए॒वम् । वि॒द्वान् । अ॒ग्निम् । उप॒तिष्ठ॑त इत्युप - ति॒ष्ठते॑ । अ॒हः ।  
दे॒वाना॑म् । आसी॑त् । रा॒त्रिः । अ॒सुरा॒णाम् । ते । अ॒सुराः॑ ।  
यत् । दे॒वाना॑म् । वि॒त्तम् । वे॒द्यम् । आसी॑त् । तेन॑ । सह । 37 (50)

**TS 1.5.9.3**

रा॒त्रिं प्रा॒विश॑न्ते दे॒वा ही॒ना अ॒मन्य॑न्त ते ऽप॒श्यन्ना॒ग्नेयी॑ रा॒त्रिरा॒ग्नेयाः॑  
प॒शव॑ इ॒ममे॒वाग्नि॑ स्त॒वाम॑ स नः॑ स्तु॒तः प॒शून् पुन॑र्दास्यतीति॑ ते  
ऽग्नि॑मस्तुव॒न्त्स ए॒भ्यः स्तु॒तो रा॒त्रिया॑ अ॒ध्यह॑रभि प॒शून्नि॑र्जा॒त् ते



दे॒वाः प॒शून् वि॒त्त्वा का॒माँ अ॒कुर्व॑त॒ य ए॒वं वि॒द्वान॒ग्निमु॒पति॑ष्ठते  
प॒शुमा॑न् भव- [ ] 38

**TS 1.5.9.3 (Padam)**

रा॒त्रिम् । प्रेति॑ । अ॒वि॒श॒न् । ते । दे॒वाः । ही॒नाः । अ॒म॒न्य॒न्त॒ । ते ।  
अ॒प॒श्य॒न् । आ॒ग्ने॒यी । रा॒त्रिः । आ॒ग्ने॒याः । प॒शवः॑ । इ॒मम् । ए॒व ।  
अ॒ग्निम् । स्त॒वाम॑ । सः । नः । स्तु॒तः । प॒शून् । पुनः॑ । दा॒स्य॒ति॒ ।  
इति॑ । ते । अ॒ग्निम् । अ॒स्तु॒व॒न् । सः । ए॒भ्यः । स्तु॒तः । रा॒त्रि॒याः ।  
अ॒धी॒ति॒ । अ॒हः । अ॒भी॒ति॒ । प॒शून् । नि॒रि॒ति॒ । आ॒र्ज॒त् । ते । दे॒वाः ।  
प॒शून् । वि॒त्त्वा । का॒मा॑न् । अ॒कुर्व॑त॒ । यः । ए॒वम् । वि॒द्वान् ।  
अ॒ग्निम् । उ॒पति॑ष्ठत॒ इत्यु॑प – तिष्ठते । प॒शुमा॑निति॒ पशु॑ – मा॒न् ।

भव॒ति॒ । 38 (50)

**TS 1.5.9.4**

त्यादि॒त्यो वा अ॒स्मा॒ल्लो॒काद॒मुं लो॒कमै॒त्सो ऽमुं॑ लो॒कं ग॒त्वा पुन॑रि॒मं  
लो॒कम॒भ्यद्ध्य॑य॒थ् स इ॒मं लो॒कमा॒गत्य॑ मृ॒त्यो॒र॒बि॒भे॒न्मृ॒त्युसं॑यु॒त  
इ॒व ह्य॑यं लो॒कः सो ऽम॑न्यते॒म-मे॒वा॒ग्निं॑ स्त॒वानि॑ स मा॒ स्तु॒तः

सु॒व॒र्गं॑ लो॒कं॑ ग॒मयि॑ष्यतीति॒ सो ऽग्नि॑मस्तौ॒त् स ए॒न॒७ स्तु॒तः सु॒व॒र्गं॑  
लो॒कम॑ग॒मय॑द् य – [ ] 39

**TS 1.5.9.4 (Padam)**

आ॒दि॒त्यः । वै । अ॒स्मात् । लो॒कात् । अ॒मुम् । लो॒कम् । ऐ॒त् । सः ।  
अ॒मुम् । लो॒कम् । ग॒त्वा । पु॒नः । इ॒मम् । लो॒कम् । अ॒भी॒ति॑ ।  
अ॒द्ध्य॒यत् । सः । इ॒मम् । लो॒कम् । आ॒ग॒त्ये॒त्या॑ – ग॒त्य॑ । मृ॒त्योः ।  
अ॒बि॒भे॒त् । मृ॒त्यु॒स॒म्यु॑त॒ इति॑ मृ॒त्यु॒स॒म्यु॑तः । इ॒व । हि । अ॒यम् ।  
लो॒कः । सः । अ॒म॒न्य॒त॒ । इ॒मम् । ए॒व । अ॒ग्नि॑म् । स्त॒वा॒नि॒ । सः ।  
मा । स्तु॒तः । सु॒व॒र्ग॒मि॒ति॑ सु॒वः॒-ग॑म् । लो॒कम् । ग॒म॒यि॑ष्य॒ति॒ । इति॑ ।  
सः । अ॒ग्नि॑म् । अ॒स्तौ॒त् । सः । ए॒नम् । स्तु॒तः ।  
सु॒व॒र्ग॒मि॒ति॑ सु॒वः॒ – ग॑म् । लो॒कम् । अ॒ग॒म॒य॒त् । यः । 39 (50)

**TS 1.5.9.5**

ए॒वं वि॒द्वान॒ग्नि॑मु॒प॒ति॑ष्ठते सु॒व॒र्ग॒मे॒व लो॒क॒मे॒ति॑ स॒र्व॒मा॒यु॒रे॒त्य॒भि॒  
वा ए॒षो॑ ऽग्नी॒ आ रो॑हति॒ य ए॒नावु॑प॒ति॑ष्ठते॒ यथा॑ ख॒लु वै  
श्रे॒या॒न॒भ्या॒रू॒ढः का॒म॒य॒ते॒ तथा॑ क॒रो॒ति॒ न॒क्त॒मु॒प॒ ति॑ष्ठते॒ न प्रा॒तः

स॒ हि न॒क्तं व्र॑तानि सृ॒ज्यन्ते स॒ह श्रेया॑श्च पापीया॑श्च आसा॒ते  
ज्योति॑र्वा अ॒ग्निस्तमो॑ रा॒त्रिर् यन् – [ ] 40

**TS 1.5.9.5 (Padam)**

ए॒वम् । वि॒द्वान् । अ॒ग्निम् । उ॒पति॑ष्ठत इत्यु॒प – ति॑ष्ठते । सु॒वर्गमि॑ति  
सु॒वः – गम् । ए॒व । लो॒कम् । ए॒ति । सर्व॑म् । आ॒युः । ए॒ति ।  
अ॒भीति॑ । वै । ए॒षः । अ॒ग्नी इति॑ । ए॒ति । रो॒हति॑ । यः । ए॒नौ ।  
उ॒पति॑ष्ठत इत्यु॒प – ति॑ष्ठते । यथा॑ । खलु॑ । वै । श्रेया॑न् ।  
अ॒भ्यारू॑ढ इत्य॒भि – आ॒रूढः॑ । का॒मय॑ते । तथा॑ । क॒रोति॑ । न॒क्तम् ।  
उ॒पेति॑ । ति॑ष्ठते । न । प्रा॒तः । स॒मिति॑ । हि । न॒क्तम् । व्र॑तानि ।  
सृ॒ज्यन्ते॑ । स॒ह । श्रेया॑न् । च॒ । पापी॑यान् । च॒ । आ॒सा॒ते इति॑ ।  
ज्योतिः॑ । वै । अ॒ग्निः । तमः॑ । रा॒त्रिः । यत् । 40 (50)

**TS 1.5.9.6**

न॒क्तमु॒पति॑ष्ठते ज्योति॑षैव तम॑स्तरत्यु॒पस्थे॑यो ऽग्नी(३)र् नो॒पस्थे॑या(३)  
इत्याहु॑र्मनु॒ष्याये॑न् न्वै यो ऽहर॑हराहत्या ऽथैनं॑ या॒चति॑ स इन् न्वै  
तमु॒पा॒र्च्छत्य॑थ को दे॒वान॑हर॒हर् या॑चिष्यतीति तस्मान्नो॒पस्थे॑यो ऽथो  
खल्वाहु॑रा॒शिषे॑ वै कं या॑जमानो यजत इत्येषा खलु वा – [ ] 41

**TS 1.5.9.6 (Padam)**

न॒क्तम् । उ॒प॒ति॒ष्ठ॒त इ॒त्यु॒प – ति॒ष्ठ॒ते । ज्यो॒ति॒षा । ए॒व । त॒मः । त॒र॒ति ।  
उ॒प॒स्थे॒य इ॒त्यु॒प – स्थे॒यः । अ॒ग्नी॒(३)ः । न । उ॒प॒स्थे॒या(३)  
इ॒त्यु॒प-स्थे॒या(३)ः । इति । आ॒हुः । म॒नु॒ष्या॒य । इ॒त् । नु । वै । यः ।  
अ॒हर॒हरि॒त्य॒हः – अ॒हः । आ॒ह॒त्ये॒त्या – ह॒त्य । अथ । ए॒न॒म् ।  
या॒च॒ति । सः । इ॒त् । नु । वै । त॒म् । उ॒पे॒ति । ऋ॒च्छ॒ति । अथ ।  
कः । दे॒वान् । अ॒हर॒हरि॒त्य॒हः-अ॒हः । या॒चि॒ष्य॒ति । इति । तस्मा॑त् ।  
न । उ॒प॒स्थे॒य इ॒त्यु॒प – स्थे॒यः । अथो॒ इति । ख॒लु । आ॒हुः ।  
आ॒शि॒ष इ॒त्या – शि॒षे । वै । क॒म् । य॒ज॒मा॒नः । य॒ज॒ते । इति ।  
ए॒षा । ख॒लु । वै । 41 (50)

**TS 1.5.9.7**

आ॒हि॒ता॒ग्ने॒रा॒शीर् य॒द॒ग्नि॒मु॒प॒ति॒ष्ठ॒ते तस्मा॑दु॒प॒स्थे॒यः प्र॒जा॒प॒तिः  
प॒शू॒न॒सृ॒ज॒त ते सृ॒ष्टा अ॒हो॒रा॒त्रे प्रा॒वि॒श॒न् ता॒ञ्छ॒न्दो॒भि-र॒न्व॒वि॒न्द॒द्-  
य॒च्छ॒न्दो॒भि-रु॒प॒ति॒ष्ठ॒ते स्व॒मे॒व तद॑न्वि॒च्छ॒ति न तत्र॑ जा॒म्य॒स्ती-  
त्या॒हु॒र्यो ऽह॑र॒ह॒रु॒प ति॒ष्ठ॒त इति॑ यो वा अ॒ग्निं प्र॒त्य॒ङ्मु॒प ति॒ष्ठ॒ते  
प्र॒त्ये॒न॒मो॒ष॒ति यः प॒रा॒ङ् वि॒ष्व॒ङ् प्र॒जया॑ प॒शु॒भि ( ) रेति॑

क॒वा॒ति॒र्य॒ङ्ङि॒वो॒प॒ ति॒ष्ठे॒त॒ नैनं॑ प्र॒त्यो॒ष॒ति॒ न वि॒ष्व॒ङ्

प्र॒ज॒या॒ प॒शु॒भि॒रे॒ति॒ ॥ 42

**TS 1.5.9.7 (Padam)**

आ॒हि॒ता॒ग्ने॒रि॒त्या॒हि॒त॒-अ॒ग्नेः॑ । आ॒शी॒रि॒त्या॑ - शीः॑ । यत् । अ॒ग्नि॒म् ।

उ॒प॒ति॒ष्ठ॒त॒ इ॒त्यु॒प॒ - ति॒ष्ठ॒ते॒ । तस्मा॑त् । उ॒प॒स्थे॒य॒ इ॒त्यु॒प॒ - स्थे॒यः॑ ।

प्र॒जा॒प॒ति॒रि॒ति॒ प्र॒जा॒ - प॒तिः॑ । प॒शून् । अ॒सृ॒ज॒त॒ । ते । सृ॒ष्टाः॑ ।

अ॒हो॒रा॒त्रे॒ इ॒त्य॒हः॑ - रा॒त्रे॒ । प्रे॒ति॒ । अ॒वि॒श॒न् । तान् । छ॒न्दो॒भि॒रि॒ति॒

छ॒न्दः॑-भिः॑ । अ॒न्वि॒ति॒ । अ॒वि॒न्द॒त् । यत् । छ॒न्दो॒भि॒रि॒ति॒ छ॒न्दः॑-भिः॑ ।

उ॒प॒ति॒ष्ठ॒त॒ इ॒त्यु॒प॒ - ति॒ष्ठ॒ते॒ । स्व॒म् । ए॒व । तत् । अ॒न्वि॒ति॒ । इ॒च्छ॒ति॒ ।

न । तत्र॑ । जा॒मि॒ । अ॒स्ति॒ । इ॒ति॒ । आ॒हुः॑ । यः ।

अ॒ह॒र॒ह॒रि॒त्य॒हः॑ - अ॒हः॑ । उ॒प॒ति॒ष्ठ॒त॒ इ॒त्यु॒प॒ - ति॒ष्ठ॒ते॒ । इ॒ति॒ । यः ।

वै । अ॒ग्नि॒म् । प्र॒त्य॒ङ्ङि॒ । उ॒प॒ति॒ष्ठ॒त॒ इ॒त्यु॒प॒ - ति॒ष्ठ॒ते॒ । प्र॒ती॒ति॒ । ए॒न॒म् ।

ओ॒ष॒ति॒ । यः । प॒रा॒ङ् । वि॒ष्व॒ङ्ङि॒ । प्र॒ज॒ये॒ति॒ प्र॒ - ज॒या॑ । प॒शु॒भि॒रि॒ति॒

प॒शु॒ - भिः॑ ( ) । ए॒ति॒ । क॒वा॒ति॒र्य॒ङ्ङि॒ति॒ क॒वा॑ - ति॒र्य॒ङ्ङि॒ । इ॒व ।

उ॒पे॒ति॒ । ति॒ष्ठे॒त॒ । न । ए॒न॒म् । प्र॒त्यो॒ष॒ती॒ति॒ प्र॒ति॒ - ओ॒ष॒ति॒ । न ।

विष्वङ् । प्र॒जये॑ति प्र – जया॑ । प॒शुभि॑रिति प॒शु – भिः॑ ।

ए॒ति ॥ 42 (63) (सि॒क्तस्य॑-स॒ह-भ॑वति-यो-यत्-ख॒लु वै-प॒शुभि-  
स्त्रयो॑दश च) (A9)

**TS 1.5.10.1**

मम॑ नाम॑ प्रथ॒मं जा॑तवेदः पि॒ता मा॒ता च॑ दध॒तुर्य॑दग्रे॑ ।

तत्त्वं बि॑भृहि पुन॒रा मदै॑तोस्तवा॒हं नाम॑ बिभ॒राण्य॑ग्ने ॥

मम॑ नाम॑ तव॑ च जा॒तवे॑दो वा॒ससी॑ इव वि॒वसा॑नौ ये च॒रावः॑ ।

आयु॑षे त्वं जी॒वसे॑ वयं॑ यथा॒यथं॑ वि॒ परि॑ दधा॒वहै॑ पुन॒स्ते ॥

नमो॑ ऽग्नये॑ ऽप्रति॒विद्वा॑य नमो॑ ऽना॒धृष्टा॑य नमः॑ स॒म्राजै॑ ।

अ॒षाढो – [ ] 43

**TS 1.5.10.1 (Padam)**

मम॑ । नाम॑ । प्र॒थम॑म् । जा॒तवे॑द इति॑ जा॒त – वे॒दः । पि॒ता । मा॒ता ।

च । दध॒तुः । यत् । अ॒ग्रे ॥ तत् । त्वम् । बि॒भृहि॑ । पुनः॑ । ए॒ति ।

मत् । ऐ॒तो॒रित्या॑ – ए॒तोः॑ । तव॑ । अ॒हम् । नाम॑ । बि॒भ्रा॒णि ।

अ॒ग्ने ॥ मम॑ । नाम॑ । तव॑ । च । जा॒तवे॑द इति॑ जा॒त – वे॒दः ।

वा॒ससी॑ इति॑ । इ॒व । वि॒वसा॑ना॒विति॑ वि-वसा॑नौ । ये इति॑ । च॒रावः॑ ॥

आ॒यु॒षे । त्व॒म् । जी॒व॒से । व॒य॒म् । य॒था॒य॒थ॒मि॒ति॒ य॒था॒-य॒थ॒म् । वि॒ ।  
प॒री॒ति॒ । द॒धा॒व॒है । पु॒नः॑ । ते इति॑ ॥ न॒मः॑ । अ॒ग्न॒ये॑ ।  
अ॒प्र॒ति॒वि॒द्वा॒ये॒त्य॒प्र॒ति॒ - वि॒द्वा॒य॒ । न॒मः॑ । अ॒ना॒धृ॒ष्टा॒ये॒त्य॒ना॑ - धृ॒ष्टा॒य॒ ।  
न॒मः॑ । स॒म्रा॒ज इति॑ सं - रा॒ज॑ ॥ अ॒षा॒ढः । 43 (50)

**TS 1.5.10.2**

अ॒ग्नि॒र्बृ॒ह॒द्व॒या वि॒श्व॒जि॒त्स॒ह॒न्त्यः॑ श्रे॒ष्ठो ग॒न्ध॒र्वः॑ ॥  
त्व॒त्पि॒ता॒रो अ॒ग्ने दे॒वा-स्त्वा॒मा॒हु॒त॒य-स्त्व॒द्वि॒वा॒च॒नाः॑ ।  
सं मा॒मा॒यु॒षा सं गौ॒प॒त्ये॒न सु॒हि॒ते मा॒ धाः॑ ॥  
अ॒य॒म॒ग्निः॑ श्रे॒ष्ठ॒त॒मो॒ ज्यं॑ भ॒ग॒व॒त्त॒मो॒ ज्य॒ञ् सह॒स्र॒सा॒त॒मः॑ ।  
अ॒स्मा अ॒स्तु सु॒वी॒र्यं॑ ॥  
म॒नो ज्यो॒ति॒र् जु॒ष॒ता॒मा॒ज्यं॑ वि॒च्छि॒न्नं य॒ज्ञ॒ञ् स॒मि॒मं द॒धा॒तु ।  
या इ॒ष्टा उ॒ष॒सो नि॒मृ॒च॒श्च ताः॑ सं द॒धामि॑ ह॒वि॒षा घृ॒ते॒न॑ ॥  
प॒य॒स्व॒ती॒रो॒ष॒ध॒यः॑ - [ ] 44

**TS 1.5.10.2 (Padam)**

अ॒ग्निः॑ । बृ॒ह॒द्व॒या इति॑ बृ॒ह॒त् - व॒याः॑ । वि॒श्व॒जि॒दि॒ति॒ वि॒श्व - जि॒त् ।  
स॒ह॒न्त्यः॑ । श्रे॒ष्ठः॑ । ग॒न्ध॒र्वः॑ ॥ त्व॒त्पि॒ता॒र इति॑ त्व॒त्-पि॒ता॒रः॑ । अ॒ग्ने॒ ।

दे॒वाः । त्वा॒माहु॒तय॒ इति॒ त्वा॒म् – आ॒हु॒तयः॑ । त्व॒द्वि॒वाच॒ना इति॑  
 त्वत् – वि॒वाच॒नाः ॥ स॒मि॒ति । मा॒म् । आ॒यु॒षा । स॒मि॒ति । गौ॒प॒त्येन॑ ।  
 सु॒हि॒त इति॑ सु – हि॒ते । मा । धाः ॥ अ॒यम् । अ॒ग्निः ।  
 श्रे॒ष्ठत॒म इति॑ श्रे॒ष्ठ – त॒मः । अ॒यम् । भ॒गव॑त्त॒म इति॑ भ॒गव॑त्-त॒मः ।  
 अ॒यम् । स॒हस्र॑सा॒तम॒ इति॑ स॒हस्र॑ – सा॒तमः ॥ अ॒स्मै । अ॒स्तु ।  
 सु॒वी॒र्य॒मि॒ति सु – वी॒र्य॑म् ॥ म॒नः । ज्यो॒तिः । जु॒ष॒ताम् । आ॒ज्य॑म् ।  
 वि॒च्छि॒न्नमि॒ति वि – छि॒न्नम् । य॒ज्ञम् । स॒मि॒ति । इ॒मम् । द॒धा॒तु ॥  
 याः । इ॒ष्टाः । उ॒ष॒सः । नि॒मृ॒च इति॑ नि-मृ॒चः । च । ताः । स॒मि॒ति ।  
 द॒धा॒मि । ह॒वि॒षा । घृ॒तेन॑ ॥ प॒य॒स्व॒तीः । ओ॒ष॒धयः॑ । 44 (50)

**TS 1.5.10.3**

प॒य॒स्व॒द्-वी॒रु॒धां प॒यः॑ ।  
 अ॒पां प॒य॒सो य॒त्प॒य॒स्तेन॑ मा॒मिन्द्र॑ स॒ꣳ सृ॒ज ॥  
 अ॒ग्नै॑ व्र॒तप॑ते व्र॒तं च॑रिष्यामि तच्छ॒केयं॑ तन्मै॑ रा॒द्ध्य॑तां ॥  
 अ॒ग्निꣳ हो॑तारमि॒ह तꣳ हु॑वे दे॒वान् । य॒ज्ञि॒या॒नि॒ह या॒न् । ह॒वा॒महे॑ ॥



आ यन्तु देवाः सुमनस्यमाना वियन्तु देवा हविषो मे अस्य ॥

कस्त्वा युनक्ति स त्वा युनक्तु यानि घर्मे कपालान्युपचिन्वन्ति-[ ] 45

**TS 1.5.10.3 (Padam)**

पयस्वत् । वीरुधाम् । पयः ॥ अपाम् । पयसः । यत् । पयः । तेन ।

माम् । इन्द्र । समिति । सृज ॥ अग्ने । व्रतपत इति व्रत – पते ।

व्रतम् । चरिष्यामि । तत् । शकेयम् । तत् । मे । राद्ध्यताम् ॥

अग्निम् । होतारम् । इह । तम् । हुवे । देवान् । यज्ञियान् । इह ।

यान् । हवामहे ॥ एति । यन्तु । देवाः । सुमनस्यमाना इति

सु – मनस्यमानाः । वियन्तु । देवाः । हविषः । मे । अस्य ॥ कः ।

त्वा । युनक्ति । सः । त्वा । युनक्तु । यानि । घर्मे । कपालानि ।

उपचिन्वन्तीत्युप – चिन्वन्ति । 45 (50)

**TS 1.5.10.4**

वेधसः ।

पूष्णस्तान्यपि व्रत इन्द्रवायू वि मुञ्चतां ॥

अभिन्नो घर्मो जीरदानुर्यत आत्त-स्तदगन् पुनः ।

इद्ध्मो वेदिः परिधयश्च सर्वे यज्ञस्याऽऽयुरनु सं चरन्ति ॥

त्रयस्त्रिंशत् तन्तवो ये वितन्निरे य इमं यज्ञं स्वधया ददन्ते  
तेषां छिन्नं प्रत्येतदधामि स्वाहा घर्मो देवाँ अप्येतु ॥ 46

**TS 1.5.10.4 (Padam)**

वेधसः ॥ पूष्णः । तानि । अपीति । व्रते । इन्द्रवायू इतीन्द्र – वायू ।  
वीति । मुञ्चताम् ॥ अभिन्नः । घर्मः । जीरदानुरिति जीर – दानुः ।  
यतः । आन्तः । तत् । अगन् । पुनः ॥ इद्धम् । वेदिः । परिधय  
इति परि – धयः । च । सर्वे । यज्ञस्य । आयुः । अनु । समिति ।  
चरन्ति ॥ त्रयस्त्रिंशदिति त्रयः – त्रिंशत् । तन्तवः । ये । वितन्निरे  
इति वि – तन्निरे । ये । इमम् । यज्ञम् । स्वधयेति स्व – धया ।  
ददन्ते । तेषाम् । छिन्नम् । प्रतीति । एतत् । दधामि ।  
स्वाहा । घर्मः । देवान् । अपीति । एतु ॥ 46 (45)

(अषाढ-ओषधय-उपचिन्वन्ति-पञ्चचत्वारिंशच्च) (A10)

**TS 1.5.11.1**

वैश्वानरो न ऊत्या ऽऽ प्र यातु परावतः ।  
अग्निरुक्थेन वाहसा ॥  
ऋतावानं वैश्वानरमृतस्य ज्योतिषस्पतिं ।

अज॒स्रं॑ घ॒र्ममी॑महे ॥

वै॒श्वा॒नर॑स्य॒ द॒स॒ना॑भ्यो बृ॒हद॑रिणादे॒कः॑ स्व॒प॒स्य॑या क॒विः॑ ।

उ॒भा पि॒तरा॑ म॒हय॑न्नजायताग्नि॒ द्या॑वापृथि॒वी भू॑रिरेतसा ॥

पृ॒ष्ठो दि॒वि पृ॒ष्ठो अ॒ग्निः पृ॒थि॒व्यां पृ॒ष्ठो वि॒श्वा ओ॑ष॒धीरा॑ वि॒वेश॑ ।

वै॒श्वा॒नरः॑ स॒हसा॑ पृ॒ष्ठो अ॒ग्निः स॒ नो॒ दि॒वा स॒ – [ ] 47

**TS 1.5.11.1 (Padam)**

वै॒श्वा॒नरः॑ । नः॑ । ऊ॒त्या । आ । प्रे॒ति । या॒तु ।

प॒राव॑त इति॒ प॒रा – व॑तः ॥ अ॒ग्निः । उ॒क्थे॑न । वा॒ह॒सा ॥

ऋ॒तावा॑नमि॒त्यृ॒त-वा॑नम् । वै॒श्वा॒नर॑म् । ऋ॒तस्य॑ । ज्यो॒तिषः॑ । प॒तिम् ॥

अज॒स्रम् । घ॒र्मम् । ई॒महे॑ ॥ वै॒श्वा॒नर॑स्य । द॒स॒ना॑भ्यः । बृ॒हत् ।

अ॒रि॒णात् । ए॒कः । स्व॒प॒स्य॑येति॒ सु – अ॒प॒स्य॑या । क॒विः ॥ उ॒भा ।

पि॒तरा॑ । म॒हय॑न् । अ॒जाय॑त । अ॒ग्निः । द्या॑वापृथि॒वी इति॑

द्या॑वा-पृथि॒वी । भू॑रिरेत॒सेति॑ भू॒रि – रे॒त॒सा ॥ पृ॒ष्ठः । दि॒वि । पृ॒ष्ठः ।

अ॒ग्निः । पृ॒थि॒व्याम् । पृ॒ष्ठः । वि॒श्वाः । ओ॑ष॒धीः । ए॒ति । वि॒वेश॑ ॥

वै॒श्वान॒रः । स॒हसा । पृ॒ष्टः । अ॒ग्निः । सः । नः ।

॥  
दि॒वा । सः । 47 (50)

**TS 1.5.11.2**

रि॒षः पा॒तु न॒क्तं ॥

जा॒तो यद॒ग्ने भु॒वना॒ व्य॒ख्यः प॒शुं न गो॒पा इ॒र्यः परि॒ज्मा ।

वै॒श्वान॒र ब्र॒ह्मणे॑ वि॒न्द गा॒तुं यू॒यं पा॒त स्व॒स्तिभिः॑ सदा॑ नः ॥

त्वम॒ग्ने शो॒चिषा॒ शोशु॑चान॒ आ रोद॑सी अ॒पृणा॒ जाय॑मानः ।

त्वं दे॒वाꣳ अ॒भि॒शस्ते॑रमु॒ञ्चो वै॒श्वान॒र जा॒तवे॑दो म॒हित्वा ॥

अ॒स्माक॑म॒ग्ने म॒घव॑त्सु धा॒रया॑नामि क्ष॒त्रम॒जरꣳ सु॒वीर्यं॑ ।

व॒यं ज॑येम श॒तिनꣳ स॒हस्रि॑णं वै॒श्वान॒र – [ ] 48

**TS 1.5.11.2 (Padam)**

रि॒षः । पा॒तु । न॒क्तम् ॥ जा॒तः । यत् । अ॒ग्ने । भु॒वना॒ व्य॒ख्य इति॑

वि – अ॒ख्यः । प॒शुम् । न । गो॒पा इति॑ गो – पाः । इ॒र्यः ।

प॒रि॒ज्मेति॑ परि – ज्मा ॥ वै॒श्वान॒र । ब्र॒ह्मणे॑ । वि॒न्द । गा॒तुम् । यू॒यम् ।

पा॒त । स्व॒स्तिभि॑रिति॑ स्व॒स्ति – भिः । सदा॑ । नः ॥ त्वम् । अ॒ग्ने ।

शो॒चिषा॑ । शोशु॑चानः । एति॑ । रोद॑सी इति॑ । अ॒पृणाः । जा॒यमा॑नः ॥

त्वम् । दे॒वान् । अ॒भि॒श॒स्ते॒रित्य॒भि – श॒स्तेः । अ॒मु॒ञ्चः । वै॒श्वान॒र ।  
जा॒तवे॒द इति॑ जा॒त – वे॒दः । म॒हि॒त्वेति॑ म॒हि – त्वा ॥ अ॒स्माक॑म् ।  
अ॒ग्ने । म॒घव॒त्स्वि॒ति म॒घव॒त् – सु॒ । धा॒रय॒ । अ॒ना॒मि । क्ष॒त्रम् ।  
अ॒ज॒रम् । सु॒वी॒र्य॒मिति॑ सु॒ – वी॒र्य॑म् ॥ व॒यम् । ज॒येम॒ । श॒ति॒नम् ।  
स॒ह॒स्रि॒णम् ॥ वै॒श्वान॒र । 48 (50)

**TS 1.5.11.3**

वा॒जम॒ग्ने त॒वो॒ति॒भिः ॥  
वै॒श्वान॒रस्य॑ सु॒म॒तौ स्या॑म॒ राजा॒ हि॒कं भु॒वना॒ना-म॒भि॒श्रीः ।  
इ॒तो जा॒तो वि॒श्वमि॒दं वि॑ च॒ष्टे वै॒श्वान॒रो य॒तते॒ सूर्ये॑ण ॥  
अ॒व ते॒ हे॒डो व॒रुण॑ नमो॒भिर॒व य॒ज्ञेभि॒रीम॒हे ह॒विर्भिः॑ ।  
क्ष॒यन्न॒स्मभ्य॑म॒सुर प्र॑चे॒तो रा॒जन्ने॒नाँसि॑ शि॒श्रथः॑ कृ॒तानि॑ ॥  
उ॒दु॒त्त॒मं व॒रुण॑ पा॒शम॒स्मद॒वाध॒मं वि॑ म॒द्ध्य॒मञ् श्र॑थाय ।

**अथा॑** व॒यमा॒दित्य॑ – [ ] 49

**TS 1.5.11.3 (Padam)**

वा॒जम् । अ॒ग्ने । त॒व । ऊ॒ति॒भि॒रित्यू॒ति – भिः॑ ॥ वै॒श्वान॒रस्य॑ ।  
सु॒म॒ता॒वि॒ति सु॒ – म॒तौ । स्या॑म॒ । रा॒जा । हि॒कम् । भु॒वना॒नाम् ।

अ॒भि॒श्री॒रित्य॑भि – श्रीः ॥ इ॒तः । जा॒तः । वि॒श्वम् । इ॒दम् ।  
वी॒ति । च॒ष्टे । वै॒श्वान॑रः । य॒त॒ते । सूर्ये॑ण ॥ अ॒वे॒ति । ते । हे॒डः ।  
व॒रु॒ण । नमो॑भि॒रिति॑ नमः – भिः । अ॒वे॒ति । य॒ज्ञे॑भिः । ई॒म॒हे ।  
ह॒वि॒र्भिरि॑ति ह॒विः – भिः ॥ क्ष॒य॒न् । अ॒स्मभ्य॑मि॒त्यस्म॑ – भ्यम् ।  
अ॒सुर॑ । प्र॒चे॒त इति॑ प्र – चे॒तः । राज॑न् । ए॒ना॒सि । शि॒श्र॒थः ।  
कृ॒ता॒नि ॥ उ॒दि॒ति । उ॒त्त॒ममि॑त्युत् – त॒मम् । व॒रु॒ण । पा॒शम् ।  
अ॒स्मत् । अ॒वे॒ति । अ॒ध॒मम् । वी॒ति । म॒द्ध्य॒मम् । श्र॒थाय॑ ॥ अ॒थ ।

व॒यम् । आ॒दि॒त्य । 49 (50)

**TS 1.5.11.4**

व्र॒ते त॒वा॒ना॒ग॒सो अ॒दि॒तये॑ स्याम ॥  
द॒धि॒क्राव्.ण्णो॑ अ॒का॒रि॒षं जि॒ष्णो॑र॒श्वस्य॑ वा॒जिनः॑ ॥  
सु॒र॒भि नो॑ मु॒खा क॒रत् प्र ण॑ आ॒यू॒षि ता॑रिषत् ॥  
आ द॒धि॒क्राः श॒व॒सा प॒ञ्च कृ॑ष्टीः सूर्य॑ इ॒व ज्यो॑ति॒षा ऽप॑स्त॒तान॑ ।  
स॒ह॒स्र॒साः श॑त॒सा वा॒ज्य॒र्वा पृ॑णक्तु म॒ध्वा स॒मि॒मा व॒चा॒सि ॥  
अ॒ग्नि॒र्मूर्द्धा॑ भुवः ।

मरुतो॑ य॒द्ध॒वो दि॒वः सु॒म्ना॒यन्तो॑ ह॒वामहे॑ ।

आ तू॒ न – [ ] 50

**TS 1.5.11.4 (Padam)**

व्र॒ते । तव॑ । अ॒ना॒गसः॑ । अ॒दि॒तये॑ । स्या॒म ॥ द॒धि॒क्राव्.ण्ण॑ इति॑  
दधि॑ – क्राव्.ण्णः॑ । अ॒का॒रि॒षम् । जि॒ष्णोः॑ । अ॒श्वस्य॑ । वा॒जिनः॑ ॥  
सु॒रभि॑ । नः॑ । मु॒खा॑ । क॒रत् । प्रेति॑ । नः॑ । आ॒यू॒षि । ता॒रि॒षत् ॥  
एति॑ । द॒धि॒क्रा इति॑ दधि॑ – क्राः॑ । श॒वसा॑ । पञ्च॑ । कृ॒ष्टीः ।  
सूर्यः॑ । इ॒व । ज्योति॑षा । अ॒पः । त॒तान॑ ॥ स॒हस्र॑सा इति॑  
सह॑स्र – साः॑ । श॒तसा॑ इति॑ श॒त – साः॑ । वा॒जी । अ॒र्वा॑ । पृ॒णक्तु॑ ।  
म॒द॒ध्वा॑ । स॒मिति॑ । इ॒मा । व॒चा॒सि ॥ अ॒ग्निः । मूर्द्धा॑ । भुवः॑ ॥  
म॒रुतः॑ । यत् । ह॒ । वः॑ । दि॒वः । सु॒म्ना॒यन्त॑ इति॑ सु॒म्न – यन्तः॑ ।  
ह॒वामहे॑ ॥ एति॑ । तु । नः॑ । 50 (50)

**TS 1.5.11.5**

उप॑ गन्त॒न ॥

या वः॑ श॒र्म श॒शमा॒नाय॑ स॒न्ति त्रि॒धातू॑नि दा॒शुषे॑ यच्छ॒ताधि॑ ।  
अ॒स्मभ्यं॑ ता॒नि म॒रुतो॑ वि यन्त॑ र॒यिं नो॑ ध॒त्त वृ॒षणः॑ सु॒वीरं॑ ॥

अ॒दि॒ति॒र्न॒ उ॒रु॒ष्य॒त्व॒दि॒तिः॑ श॒र्म॒ य॒च्छ॒तु॒ । अ॒दि॒तिः॑ पा॒त्व॒ह॒सः॑ ॥  
 म॒ही॒मू॒षु॒ मा॒तर॑ सु॒व्र॒ता॒ना॒मृ॒त॒स्य॑ प॒त्नी॒म॒व॒से॑ हु॒वे॒म॒ ।  
 तु॒वि॒क्ष॒त्रा॒-म॒ज॒र॒न्ती॑-मु॒रू॒ची॑ सु॒श॒र्मा॒ण॒म॒दि॒ति॑ सु॒प्र॒णी॒तिं॑ ॥  
 सु॒त्रा॒मा॒णं॑ पृ॒थि॒वीं॑ द्या॒म॒ने॒ह॒स॑ सु॒श॒र्मा॒ण॒( )॑ म॒दि॒ति॑ सु॒प्र॒णी॒तिं॑ ।  
 दै॒वीं॑ ना॒व॒ स्वरि॑त्रा-म॒ना॒ग॒स॒-म॒स्र॒व॒न्ती॒मा॒ रु॒हे॒मा॒ स्व॒स्तये॑ ॥  
 इ॒मा॒ सु॒ ना॒व॒मा॒ ऋ॒ह॒ श॒ता॒रि॒त्रा॒ श॒त॒स्प॒यां॑ ॥  
 अ॒च्छि॒द्रां॑ पा॒रयि॑ष्णुं ॥ 51

**TS 1.5.11.5 (Padam)**

उ॒पे॒ति॑ । ग॒न्त॒न॒ ॥ या॒ वः॑ । श॒र्म॒ श॒श॒मा॒ना॒य॑ । स॒न्ति॑ । त्रि॒धा॒तू॒नी॒ति॑  
 त्रि॒ - धा॒तू॒नि॑ । दा॒शु॒षे॑ । य॒च्छ॒त॒ । अ॒धि॑ ॥ अ॒स्म॒भ्य॒मि॒त्य॒स्म॒-भ्य॒म् ।  
 ता॒नि॑ । म॒रु॒तः॑ । वी॒ति॑ । य॒न्त॒ । र॒यि॒म् । नः॑ । ध॒त्त॒ । वृ॒ष॒णः॑ ।  
 सु॒वी॒र॒मि॒ति॑ सु॒-वी॒र॒म् ॥ अ॒दि॒तिः॑ । नः॑ । उ॒रु॒ष्य॒तु॒ । अ॒दि॒तिः॑ । श॒र्म॒ ।  
 य॒च्छ॒तु॒ ॥ अ॒दि॒तिः॑ । पा॒तु॒ । अ॒ह॒सः॑ ॥ म॒ही॒म् । उ॒ । स्वि॒ति॑ ।  
 मा॒तर॑म् । सु॒व्र॒ता॒ना॒मि॒ति॑ सु॒ - व्र॒ता॒ना॒म् । ऋ॒त॒स्य॑ । प॒त्नी॒म् । अ॒व॒से॑ ।  
 हु॒वे॒म॒ ॥ तु॒वि॒क्ष॒त्रा॒मि॒ति॑ तु॒वि॒ - क्ष॒त्रा॒म् । अ॒ज॒र॒न्ती॒म् । उ॒रू॒ची॒म् ।



सु॒शर्मा॑णमि॒ति सु – शर्मा॑णम् । अदि॒तिम् ।  
सु॒प्रणी॑तिमि॒ति सु – प्रणी॑तिम् ॥ सु॒त्रामा॑णमि॒ति सु – त्रामा॑णम् ।  
पृ॒थि॒वीम् । द्याम् । अ॒ने॒ह॒सम् । सु॒शर्मा॑णमि॒ति सु – शर्मा॑णम् ( ) ।  
अदि॒तिम् । सु॒प्रणी॑तिमि॒ति सु – प्रणी॑तिम् ॥ दै॒वीम् । ना॒वम् ।  
स्व॒रि॒त्रामि॑ति सु – अ॒रि॒त्राम् । अना॑गसम् । अ॒स्र॒वन्ती॑म् । ए॒ति ।  
रु॒हे॒म । स्व॒स्तये॑ ॥ इ॒माम् । स्वि॒ति । ना॒वम् । ए॒ति । अ॒रु॒हम् ।  
श॒ता॒रि॒त्रामि॑ति श॒त – अ॒रि॒त्राम् । श॒त॒स्प॒यामि॑ति श॒त – स्प॒याम् ॥  
अ॒च्छि॒द्राम् । पा॒र॒यि॒ष्णुम् ॥ 51 (69)  
(दि॒वा स॒-स॒ह॒स्रि॒णं वै॒श्वान॑रा-दि॒त्य- तू नो॑-ऽने॒ह॒सꣳ सु॒शर्मा॑ण-  
मे॒का॒न्न॒विꣳश॑तिश्च ) (A11)

=====

**Prasna Korvai with starting Padams of 1 to 11 Anuvaakams :-**

(दे॒वा॒सु॒राः-प॒रा-भू॒मिर्-भू॒मि-रु॒प॒प्र॒य॒न्तः-सं प॒श्या-म्य॒य॒ज्ञः-  
सं प॒श्या-म्य॒ग्नि॒हो॒त्रं-म॒म ना॒म-वै॒श्वान॒र-ए॒का॒द॒श) ।

**Korvai with starting Padams of 1, 11, 21 Series of Panchaatis :-**

(दे॒वा॒सु॒राः-कु॒ब्धः-सं प॒श्या॒मि-सं प॒श्या॒मि-न॒क्त-मु॒प॒ग॒न्त-  
नै॒क॒प॒ञ्चा॒शत्)

**First and Last Padam of Fifth Prasnam :-**

(दे॒वा॒सु॒राः-पा॒र॒यि॒ष्णुं)

॥ हरिः ओं ॥

॥ कृष्ण यजुर्वेदीय तैत्तिरीय संहिता पद पाठे प्रथमकाण्डे पञ्चमः

प्रश्नः समाप्तः ॥

---

### Summary breakup of Padam - in Kaandam 1, Prasnam 5

Particulars		Example ( in Pada PaaTam)	No. of Padams as per Pada PaaTam
सामान्य पदानि	Ord	इषे । त्वा । ऊर्जे ।	2129
उपसर्ग पदानि	PRE	एति = (आ+इति) । उपेति = (उप+इति) । प्रेति = (प्र+इति) ।	191
वेष्टन पदानि	PS	उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) ।	369
प्रग्रह पदानि	PG	ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति ।	18
प्रग्रह वेष्टन पदानि	PGS	अधिषवणे = अधिषवणे इत्यधि - सवने । इन्द्राग्री = इन्द्राग्री इतीन्द्र - अग्री	10
Total Padams			2717

### Details of Panchati and Padam for Kandam 1, Prasanam 5 – (TS 1.5)

	Panchati	Padams
Anuvakam 1	4	225
Anuvakam 2	5	236
Anuvakam 3	3	163
Anuvakam 4	4	225
Anuvakam 5	4	217
Anuvakam 6	4	229
Anuvakam 7	6	316
Anuvakam 8	5	279
Anuvakam 9	7	363
Anuvakam 10	4	195
Anuvakam 11	5	269
Total →	51	2717